

萬有文庫

第二集七百七種

王雲五主編

明詩紀事

(六十二)

陳田輯

商務印書館發行

明詩紀事

(六十二)

陳田輯

國學基本叢書

明詩紀事卷十

辛籤

邢昉五十五首

昉字孟貞高淳人崇禎諸生有石臼前集九卷後集七卷。

顧夢游茂綠軒集孟貞所尙在太祝蘇州隨州考功間上溯顏謝旁及郊島涵泳久之駸駸成家矣。

漁洋詩話余最許石湖邢孟貞五言詩以爲韋柳門庭中人恨未及友其人官祭酒時鄉人李君令高淳特屬訪其子孫李至訪之則老妻稚孫焚焚孤寡饑粥不繼李脫贈三百金爲置腴田其家竟不知余意也施愚山聞之遣余再拜曰某交孟貞三十年不能卹其後人之窮公與孟貞未定交而能卹其身後令不凍餓以死某愧公多矣至爲流涕。

池北偶談順治辛丑李退菴過揚州余遣謁舟中因論近布衣詩舉程嘉燧吳兆退菴曰終須還他邢昉第一。

施閩章愚山集孟貞詩以陶汰爲工以沖淡爲則以婉惻悲涼爲致其企而之峻潔也若病暈者之思清冷其賦穠縟而引避也若見泥豕而負塗而執袖之蒙糞土也故其詩清越無纖埃人病之爲郊寒島瘦不卹也觀其所長則旣與錢左司劉隨州伯仲矣孟貞嘗謂余曰剝盡今人面皮斯成古人讀其集信然。

宋肇四陂類要孟貞詩凄清悲壯山峙雲涌多濃厚之遺無怨誹之失具體少陵而出入章孟錢劉以發其菁華才兼衆體誠名家也。

田按孟貞論詩謂漢魏不可爲唐人惟不爲漢魏故能臻於極孟貞五言取徑唐人而時涉柴桑籓籬以幽秀淡宕爲宗得儲

章之自然無轉孟之刻厲明李布衣詩邢昉第一徇爲確論

夜宿石門

越山青至天。越水綠如玉。霧霞盈一溪。落日絢幽谷。緬懷古昔人。結綬膺良牧。沈涵山水遊。放浪石門宿。顏色不可見。思踏嶺上躅。風榛寂遠聽。礪戶引高矚。一宿詎能忘。歷覽亦已足。霏霏巖下泉。飲啜共野鹿。

雜詩

幼安昔避地。茫茫涉廣川。踰海不謂遠。一去四十年。往往談名理。亶亶造深玄。問所與談誰。乃是公孫淵。口罔論世事。聊此相周旋。龍德旣無損。清風久逾宣。生世偶相符。其當師此賢。

和汪希伯雨後田家作

涼雨露禾黍。晚風亦徐生。林木發華滋。乃得佳樹情。老農朝荷鋤。忻茲茅檐晴。出門旣有事。仰見浮雲征。孤雲有卷舒。予亦鋤且耕。

上翠微嶺訪煉丹臺三皇井觸熱至白雲菴是楞嚴安禪師道場

曉煙開衆壑。嶺表延炎暉。訪古荒臺下。軒皇迹已微。井渫尙未改。精廬閒雙扉。冥冥麝麝境。杳杳人跡稀。昔聞道場鼓。花雨飄一圍。世外猶寂寞。白雲空霏霏。

由玄通洞至梅雨潭觀瀑

出洞逕已絕。恍惚迷所往。仰觀石壁峻。近見數峯敞。猗猗伏咒守。使轉騰猿上。砮鏑梅雨潭。素雪霏蕭爽。岸開一流奔。氣冷浮雲滂。乍疑節候殊。更疑天地廣。回轉得前路。始聞屐齒響。笑謂同遊人。誰能共俯仰。游墅迅風一日至嘉興作

江路忽綿邈。惆悵東風前。微茫歷吳縣。水上開寒煙。夜潮漲溪綠。夾岸桃花然。雲昏天欲雨。一鳩鳴桑田。越溪轉空朗。百道輕洄沿。新林吐微月。晚色猶澄妍。孤舟正寥落。況復聞扣舷。

龍友置酒江心寺避暑與無補各賦五首錄一

蕩舟入江嶼。輕橈撥淺瀨。羣木秀高岸。倏與長風會。東南渺何許。曠然白雲外。至夜海色來。蕭條有餘慨。段橋

橋北峯巒翠。橋南泱泱春。因看外湖水。分映六橋人。煖日縈絲柳。微波裊細蘋。海雲遙聚散。寺閣迴嶙峋。鳥度聞橫籟。魚驚避采蓴。沿流去何所。杳杳落花津。

泛甌江作

南登仙人巖。載汲三皇井。旣以思邃古。復此懷幽屏。燁燁巖下芝。可以駐迅景。咒虎相叫噪。欲采道路梗。朱鳳饑不食。粟麥延鳧頸。人寰不可處。悵望三山影。

古興二首

北風捲枯蓬。飛鳥各斂翼。陽光忽西墜。奔獸向我擲。凝寒盛肅殺。萬類莫能息。我胡亦復然。東西事行役。道傍有死人。已供烏鳶食。生者不自保。徒爲死者側。漢道昔再盛。投戈息羣姦。矯矯梁夫子。浩歌乃出關。舉目覽四海。愴慨涕潺湲。我方遭世亂。安能辭險艱。常恐白日速。不覩大運還。永隨霜與雪。泯滅蓬蒿間。

由金壇過見末田舍作

五載隔君廬。依依辨林木。帆帶甓橋煙。舟行石塘曲。扣戶寂無人。荆扉日日關。髻山雨初暗。長蕩水如環。雨多林氣溼。薄霧閒清晝。開扉指稻田。伏几看禾秀。聞君時抱犢。旦夕爲饔飧。舊穀幾時斷。中男昨歲婚。雖復少饘粥。新詩每逾帙。舒卷自悠悠。孤雲澹無迹。

五平五仄體

空林雲方生。廣澤月已冷。松間通微明。露下溼練影。枯榛聆鳴螿。隔水見繫艇。孤懷終沈沈。永夜不復整。

憶兒詩

汝生初墮地。我遊五茸城。三月始入門。聞汝呱呱聲。從此更遠邁。越嶠東南征。三爲象浦客。六傍惡谿行。在遠日何多。在家日何少。屈指幾度別。垂髻忽已好。三歲別我時。門前牽我衣。宛轉學人語。問我幾時歸。四歲及五歲。別我涕能揮。七歲差解事。鞠躬步庭幃。去冬復別我。含悽扣所如。本言渡江去。卻寄白門書。

今年汝九齡。毛詩誦曹鄴。翩翩過父友。再宿傾肝肺。前月有書來。頗與人意會。世亂我已老。我衰汝始大。如何久契闊。喟焉發長嘅。

別介立上人

東林黃葉遍。返景躡幽境。入山鳥始棲。開戶迹逾靜。釋子於日閒。晏坐冥真性。客至方下床。齋餘忽聞磬。因投塵中語。不忘別時詠。露下籜猶飄。林中風稍勁。我耕湖浦田。子有雲山興。他日遠相尋。何方正禪定。

閒齋對雨

本非習世務。時亦涉紛糾。茲晨適無事。展書對虛牖。涼雨灑平野。輕風颺高柳。旣已盪煩蒸。又以霑田畝。志氣方自怡。耕作庶無負。稍知是日閒。但覺爲時偶。平生諒如此。於世復何取。

雨中作

季夏始苦燠。形羸憂未央。滂沱對簷雨。始覺絳絡涼。庭柯洗衆綠。瀟灑映虛堂。而我中所懷。遠在葭菼鄉。新苗眷嘉澤。溝水生菰蔣。衡門俯眄隰。開戶時相望。歸歟豈必晚。庶及此登場。

陽邏汎

艤舟陽邏汎。紆步陽邏寨。壘石儼城堞。禦暴有深戒。頽牆幸未墮。猶是楚關隘。荒墟衆莽遮。數戶殘陽在。遠適棄柴荆。乍歸理春簣。新穀始舂糧。中雜稊與稗。瓜青併芡紫。稍稍已充賣。昨過武昌兵。驚奔如避蕩。

吁嗟麻城賊。復屯百里界。父老一二人。問答形羸憊。其言絕酸苦。兵賊迭近避。破廬雖暫息。終亦成于邁。且暮此偷生。吞聲死茅廁。

冬日同徐州來崔季韞莫愁湖眺望

霜霽天更清。衆潦縮而小。澄泓莫愁湖。微波猶淼淼。演漾餘水木。彷彿動寒藻。耦勝樂嘉招。出城卽幽討。閒亭息游侶。煖日逢魚鳥。乍憇慮已遣。躊躇魂復悄。回思四海晏。樓閣此中好。風景豈復有。世事久紛擾。峨峨清涼山。黃葉落漸少。蕭條亦如此。雲煙互繞繚。

哭胡印度

衆人各貪生。同盡靡不然。君已祛斯累。憑化聊忽遷。哀樂復何有。顧余未能捐。銜悽追往昔。再歲逾縣縣。茅茨儼虛位。殯宮屋西徧。遊塵積素几。零露被荒阡。貧巷氣悽惻。潦縮無流泉。生死豈云隔。徒悲化者賢。傷于子秬

積雨動離舟。門前秋水次。別緒已含悽。緘書更徂歲。書中吐亮辭。於世無多意。思憶平生懷。躊躇熱肝肺。蒼旻何其悠。白日忽西墜。人生如春冰。一泮成東逝。日夕茅嶺遊。相看隨悲淚。於世無多意。子秬書中語。

梁山

宵泊蘆洲月。枕上聞潺湲。雞鳴峭帆起。洲勢多迴環。開牕眺前浦。忽見西梁山。蒼蒼朝靄裏。演漾晴波間。

東梁相對出。薜壁儼如鬢。翠削類中斷。絕頂殊可攀。凌風去何駛。聊得舒心顏。不及巖頭鵠。終年巢松關。

離漢口

旅舟泊漢水。荏苒至寒節。朝看楚雲興。暮觀楚雲滅。此地雖破殘。井術稍成列。銀鱗日充市。食鮮每豐潔。客心復何苦。遇物轉淒切。茲辰忽返櫂。脈脈情內熱。風土漸相諳。山川屢迴折。故鄉豈不懷。信美亦愴別。未逢漢陰老。令我憂思悒。

遊招隱寺有戴顓遺迹

東郊草色徧。出郭路已緬。登頓窮迴蹊。屢覺前山轉。招提頗闕寂。滿徑惟蒼蘚。一與人境遠。驟矜塵累遣。撫跡想曩賢。幽林此偃蹇。當時動萬乘。於道能舒卷。澗芳始馥郁。石溜彌清淺。白雲復層層。徘徊度遙巘。沈冥逾千載。礪戶欣來踐。窅然巖溪間。日入更遊衍。

答葛士元寄書

憶與君握手。句溪清且嘉。平蕪來燕子。野寺開桃花。衝雨過鐵澗。曲折尋幽遐。豈惟誇水木。亦以眷桑麻。甯料轉盼間。世變浩無涯。此地竟流血。鋒鏑虺龍蛇。荏苒別三載。簸蕩風中沙。寄書感疇昔。聚散同飛鴉。翩翩稚川孫。戟髯鬢未華。一水渺相望。漠漠春雲遮。著書且努力。勿遽事丹砂。

雲間西還別陸集生

陸生昂藏二十幾。聲名颯沓如流水。太華鋒高五千仞。文章突兀奇過此。家在吳淞一水涯。迴眸顧盼光成霞。少年生長三公里。數世烏奕尙書家。尙書風節古希邁。有子立朝少司寇。父子兩世皆蒙恩。陸生腰下無寸綬。甲第聯雲讓季昆。郭外流泉空在門。門前流水東入海。往往人號平原邨。白苧城中足風雨。獨共陸生相勞苦。鶴唳秋開島上煙。雞鳴夜聽樓頭鼓。相思千里何閒關。前人陳迹猶班班。黃歇尙餘鴻雁浦。吳王剩有干將山。陸生氣岸真輝赫。上策十年仍落魄。貧賤人看白面郎。功名誰識斑駁客。三載東來碧草芬。一朝揮袂有離分。莫愁湖上徘徊月。揚子津邊無限雲。我去五湖惟蕩槳。白鷗茫茫日更往。欲寄迢迢海岸書。鯉魚一尺隨潮上。

太白山人

太白高高西蠱秦。人言山人爲秦人。一生放浪入吳越。玉質曾不洗風塵。縱心羽化事服食。丹砂恍惚輕千春。亦復高歌中宮徵。松風髮髮蒼崖裏。仍諧伉儷衣薜荔。服食求仙事皆已。山人氣勢亦罕比。拙嗟頽頽何與李。門前車騎丞相來。海上遙看赤雲起。嗚呼太白之峯安可攀。遠遊未厭辭人間。茗花如雪傷顏顏。千秋突兀道場山。

海雲歌送方爾止雲間返白下

海雲迢迢條飄忽。白門歸客愁不發。芳蹊碧樹遶吳天。桂楫蘭橈蕩秋月。君家甲第何蟬聯。桐山秀出接

龍眠弱冠聲名起江介。片言落紙飛雲煙。平生少孤亦坎壈。脫略繁華厭尾瑣。讀書已破一萬卷。作賦談兵無不可。十載桐城戰血斑。峨峨白骨成邱山。登陴授甲何慷慨。指麾破敵如等閒。君抱奇才遭世難。長揖戎軒幘常岸。賭墅何當笑謝安。從軍不得同王粲。孤舟鼓柁滯江皋。感此踟躕心鬱陶。酒邊落落歌長缺。腰下時時看寶刀。酌酒與君勿嗚咽。古來才大轉愁絕。前年避地長干居。一回又向江門別。江門落日水悠悠。黃浦潮生逐去舟。相思鐵甕城南夜。獨倚危檣看斗牛。

觀楊龍友畫山水冊子董宗伯書跋作歌

楊子性癖畫山水。胸中突兀眼中起。巒壑窈窕煙霧生。倏忽風雨如在耳。手拂絹素神已通。耳目不御遊鴻濛。鴻濛以前未有此。此時突出真神工。我觀此冊凡十圖。千流萬壑態各殊。桃源輞川久寂寞。雲門若耶胡爲乎。誰言此境世所無。彷彿廬岳凝衡巫。楊子產夜郎。山水天下絕。牂牁以南峯插天。一一寫出森嶽嶠。畫家惟取胎骨奇。細論流脈良足嗤。平生所好或彷彿。氣格頗似黃大癡。梅花道人亦其亞。一二迫肖非追隨。武陵楊公楊子師。擊節愛好渴且饑。十年購得萬松卷。縹囊什襲如鼎彝。妙手董宗伯。駕軼文與沈。歎息展此圖。摩挲盡題品。此圖在世珍瑤璵。況有淋漓宗伯書。楊子腹中書萬卷。四十公車惟破硯。爲我且掃一疋絹。明歲長安見天子。放筆一揮大同殿。

題楊日補所藏楊龍友畫雲山圖

君家堂上開雲煙。乍披忽覲心惘然。畫者何人此好手。故人已沒今五年。故人昔爲永嘉宰。謝客山川宛相待。仙巖谷口睇煙霏。玉甌峯頭眺雲海。往往揮灑作畫圖。巖巒突兀茅堂孤。卽如此圖極瀟灑。松風彷彿聞笙竽。斯人歷落多情興。君與結交非異姓。繪事同誇楊契丹。兩家筆迹堪相競。寫罷遠山偶未閒。君爲點染顛崖間。圖成價已等尺璧。摩挲涕下空潺湲。生前粉繪人爭取。死後聲名尤冠古。可憐埋骨竟茫茫。四海九州無寸土。憶昔爲我一揮雲山小屏幃。縹緲龍湫與雁宕。正與此圖相頡頏。吞聲想像一惆悵。

過羅刹磯

漢陽江邊一月坐。船頭乍撥西風簸。五日已渡潯陽江。小孤娉婷浪中過。昨日狂風忽東轉。舵折檣欹太偃蹇。三宿始泊李楊河。蘆黃沙白潮痕淺。數戶蕭蕭破屋扉。黃昏月落雁飛飛。曉來舟子俄相報。起看江心羅刹磯。

銅雀臺

魏國山河在。雄圖勢已休。漳河遙入海。大陸莽生秋。井幹空遺恨。君恩不可留。誰憐歌舞罷。松柏晚颼颼。

王昭君

漢宮回望絕。青海路逶迤。一曲琵琶語。千秋羅綺悲。逝將黃鵠侶。沒向紫臺陲。怨結胡天月。悠悠無盡時。

周勒卣從新安還雨中過訪賦此

行李投于越。迴舟喜扣舷。夜潮初過朏。夏潦卽稽天。少室千峯思。滄江一雨懸。茫茫各辛苦。去逐海門煙。
勸甫去歲遊中州時將與予先後往白門也。

送宗遠入燕

江流渺不極。帆影復重重。國步方求駿。天心豈臥龍。離人揚子渡。愁思廣陵鐘。無限雲山隔。依依柳上峯。
晚過三山宿大勝關

峩眉亭上月。忽在數峯西。始見漁梁火。因聞關店雞。維舟三戶少。吹角片雲迷。自古江南地。詞人賦慘悽。
亂離詩贈黔僧利根次潭吉韻

故國兵戈地。風雲尙覺昏。亂離思舊鬼。驚定住新魂。行世已如葉。言愁別有根。三年蠻海淚。猶記昔成痕。
與九信至招往園中賦答

聞說長林下。淒清祇似冰。言招麝性友。如對鶴形僧。竹色涼舒履。桐陰安曲肱。此時延佇意。切怛諒難勝。
送九水還廬山

江舟彌不易。此日見朝霜。書寄他僧去。路因寒月長。彭蠡一衲遠。雲霧六朝荒。數雁煙邊沒。離心愈淼茫。
閩門遇穆倩因訊僧彌

一逢荀奉倩。吳市此相同。結客向滄海。吹簫滿碧空。水浮鶴澗綠。花映杜鵑紅。爲問偕遊者。誰如皋伯通。

上嚴子陵釣臺

已躡千秋跡。因登百尺亭。潮生兩崖碧。天入衆峯青。獨戍唳江鳥。孤槎訪客星。長思人代裏。幾得此鴻冥。

游城南栖霞寺

水際泝洄去。溪橋亘衆流。嵐煙仍自合。荷芰稍能幽。破壁饑麝集。殘柯倦鳥投。賴因松雨細。一灑盡煩憂。

歲暮行經七里瀧

入瀧投暝色。瀧盡復煙霏。極浦桐廬縣。天空出翠微。鷓鴣浮凍港。沙岸動朝暉。愁思當窮臘。皇皇獨未歸。

雨中遣悶

三載來甌渚。滂沱釀夏寒。因憐江鳥熟。已作越人看。閒臥施桃簟。清羸岸葛冠。仲宣今有賦。歎息滯荆蠻。

和祖心上人遊城南方正學先生祠

寂寂荒祠野靄昏。蕭蕭殘碣倚松根。金川門又成亡國。石子岡偏欲斷魂。昔日麻衣慚叔父。于今青草失王孫。廢興自古須臾事。獨有先生戀主恩。

過齊尚書祠

尚書祠下千回過。此日沾巾淚未休。蘋藻已荒兵燹歲。江山忽似革除秋。真人一姓猶甘死。流水孤城何限愁。寥落空庭惟繫馬。井欄摧折斷煙浮。

別爾正發舟往越中

驪歌惆悵莫愁湖。二月江城酒共沽。採藥謾尋春草去。披裘還似客星無。行追碧澗雲門近。轉憶青山皖伯孤。千里迢迢楊柳色。令人揮淚聽嘯烏。

送趙孟邊往天台因還山陰

赤厓障天白日冥。木葉四落黃滿庭。一客獨往賦窮鳥。五侯誰愛分嘉鯖。剡溪西歸窮夜壑。蜃水東下揚曉舲。石梁玉龍冰欲結。回望括嶺何青青。

立秋日晚登丹陽城樓

古堞崔嵬映碧流。長江萬里一含愁。城邊月出還聞角。水上雲來始見秋。鴻雁幾時穿塞路。白蘋無日不汀洲。丹陽郭外萋萋柳。夜送潮聲到石頭。

與高座寺介立期登木末亭未果

寺外高崖積霧凝。遙憐風雨不同登。坐看雲氣流寒堞。欲遣塵機對病僧。九日乍聞連雁過。千秋還見大江澄。蒼梧近在鍾山麓。愁上孤亭望舜陵。

黃州寄杜于皇

羣岸風淒日漸微。長隄繫艇晚依依。十年紅樹辭鄉去。八月黃州見雁飛。燒罷林廬殘址在。戰餘茅屋幾

家歸翻憐此夕君思我。揚子潮回木葉稀。

漢江懷古

此其方城扼楚關。英雄消盡逝波間。微霜欲下漢陽樹。落日初銜大別山。蘭杜秋來洲尚綠。瀟湘南去竹多斑。燒殘崔顥題詩處。一眺風煙倍慘顏。

九日大別山登高

鸚鵡洲邊草盡黃。白沙如雪禹祠荒。古來哀怨多歸楚。此日煙波正望鄉。山翠乍連杯酒色。亂離頻過幾重陽。眼前不見茱萸紫。起傍峯頭數雁行。

錢塘潮

曉色千橋發。危濤萬馬奔。豈知此澎湃。中有子胥魂。

貞白墓

白日冲昇底遲。因緣本草事堪疑。茅家兄弟皆鸞鶴。卻見先生墓有碑。

橫塘曲

江宿鴛鴦浪宿鷗。芙蓉零亂木蘭舟。白蘋渡口橫塘女。箇箇生來字莫愁。

錢澄之二十首

初名秉鐙。字幼光。避禍削髮爲僧。名幻光。復冠帶。改名澄之。字飲光。桐城人。崇禎諸生。有藏山閣稿。田間詩文集。

徐乾學澹園集。飲光先生自甲申變後。南都擁立新主。姦邪柄國。羣小附之。濁亂朝政。而爲之魁者其鄉人也。以夙負盛名之士。慷慨好持正論。與鄉人迕。及其得志。修報復。固欲得而甘心焉。刊章捕治。將興大獄。於是亡命走浙。閩。又自閩入粵。崎嶇絕徼。數從鋒鏑間。支持名義。所至輒有可記。

轉窅有懷堂集。飲光少負盛名。爲諸生祭酒。遭明季。崎嶇喪亂。與時消息。其用至妙。未易窺也。其爲詩。沖淡深粹。出於自然。匹王孟而及於陶矣。

靜志居詩話。幼光禁網潛蹤。麻糲間道。或出或處。或嘿或語。詩屢變而不窮。要其流派。深得香山。劍南之神髓。而融會之。牧齋錢氏錄其作入吾炙集。蓋深取之矣。昔賢評陶元亮詩云。心存忠義。地處閑逸。情真景真。事真意真。田間一集。庶幾其近之。姚經三無異堂集。飲光南渡時。遭黨錮。亡命流滯嶺嶠。歸則皤然老頭陀矣。好飲酒。談諧。放浪山水間。每酒後談說平生。聲淚俱下。時時吟詩。不拘一格。上有漢魏。下迄中晚。隨興所至。卽爲之。古詩感慨諷諭。婉而多風。真得古三百篇之旨。

明詩別裁。幼光自抒情性。無意工詩。五言似陶。亦在神理。不在字句。與高忠憲。歸待詔所謂異曲同工者也。徐璈桐舊集。飲光集詩說曰。詩有其才焉。有其學焉。有才人之才。聲光是也。有詩人之才。氣韻是也。有學人之學。淹雅是也。有詩人之學。神悟是也。故詩人者。不惟有別才。抑有別學焉。

田按。田間五古擬柴桑。七古擬張王。樂府亦近香山。殘明逸老。可與邢孟貞肩隨。

田園雜詩

人生會有盡。行止非自由。止亦不可趣。行亦不可留。如何柴桑叟。汲汲爲此憂。終年痛飲酒。冀以忘其愁。

吾身聽物化。化及事則休。當其未化時。焉能棄所謀。有子亦須教。有田亦望收。天心于人事。何息不同流。我不離世間。而願與天遊。焉能外親戚。視之同浮瀛。乃知黃老書。不如孔與周。

詠史

中原昔喪亂。戎羯互塗炭。共偷江左安。坐看神州陷。壯哉劉宋公。直上咸陽殿。百年宿穢清。天日重相見。可憐秦父老。壺箠遍畿甸。天下望風降。拓跋不敢戰。一朝棄之行。急歸圖晉禪。關中自足帝。方隅何用篡。空使向化民。再罹犬戎饑。功名不得收。古今一長歎。

寄藥地無可師

風動知歲晚。木落知天寒。居人篝火坐。各各掩其關。言念藥地翁。一身棲廩山。廩山在何所。草屋八九間。江右土氣薄。況經兵燹殘。縑袍豈能溫。粗糲甯可餐。又聞終歲病。鬚鬢不復斑。豈徒無與侶。枯淡恐無歡。念此不能往。喟焉摧心肝。

雜詩二首

步出城西門。荒隄何逶迤。衰柳夾隄植。上宿鷗與鷗。路傍有古廟。入門樞纍纍。借問此何人。云是義士屍。寄此頗有年。親戚不敢移。中有慷慨士。平昔心相知。始志在捐軀。臨危果不欺。旅魄滯曠野。冤魂當訴誰。徘徊不能去。愴惻傷肝脾。

鬱鬱青槐巷。中有壯麗居。華棖耀金碧。交窻結綺疏。高樓臨大道。豔色照通衢。昔爲富人宅。今爲丞相廬。行人不敢過。過者爲下車。別去無幾時。門巷忽荒蕪。雙扉白晝瑣。中有官物儲。問之丞相歿。得罪身被誅。妻孥遠戍邊。籍沒無復餘。識時稱俊傑。斯人計豈疏。屈節以保身。禍至還突如。悵念平生交。夷滅何欵歎。

贈胡處士星卿

榮榮畦中蔬。孌孌門前柳。畦以木槿籬。門用桑樹紐。茅屋入蒿萊。江聲通戶牖。中有避世人。言是東陵後。多年不入城。一卷常在手。客來問所爲。良久乃開口。有時還見招。臨流一觴酒。

雞鳴有序

客寢不寐。久之乃聞雞鳴。感而作此。展轉反側。再成諸作。

冬已過半夜偏長。愁人不寐。獨在牀。寒雞擁翰不肯叫。老鷓得氣山頭嘯。山頭有虎伺人行。佞鬼騎虎學雞鳴。雞在牆根鼓兩翅。欲鳴不鳴時未至。邨南邨北聞犬喧。雞未三唱勿出門。窗前山鬼大無賴。低頭樹下學人拜。遙遙古寺打鐘聲。一聲一拜聲聲驚。雞鳴一聲天下白。千狀萬態從此滅。

泥鳅行

人家堂坳水不乾。疑有怪物水中蟠。田蛙無聲蚯蚓縮。爭傳此物頭有角。老巫見之禮最恭。云是洞庭行雨龍。作法燒符請龍子。雷火滿空龍不起。不知蜥蜴徑寸身。亂打雪雹猶有神。旁人還恐變化去。那知藏

在泥深處。汲水取泥投江流。蜿蜒乃是泥中鯀。泥中鯀。何足怪。空使老巫朝夕拜。

催糧行

催完糧。催完糧。莫遣催糧吏下鄉。吏下鄉。何太急。官家刑法禁不得。新來官長亦愛民。那信民家如此貧。朝廷考課催科重。鄉里小民肌膚痛。官久漸覺民命輕。耳熟甯聞冤號聲。新增有名官有限。兒女賣成早上縣。君不聞南村大姓吏催糧。夜深公然上婦床。

水夫謠

水夫往在長江邊。年年捉送裝兵船。上水下水不記數。但見船來點夫去。十年家門派一夫。生死向前無怨怒。衣中何有苦搜索。身無錢使夜當縛。遭他鞭朴無完膚。行遲還用刀箭驅。擊刀在腰箭在手。人命賤同豕與狗。射死紛紛滿路屍。那敢問人死者誰。爺孃養汝纔得力。送汝出門倚門泣。腐肉已充烏鳶饑。家猶望水夫歸。

胡星卿茅屋歌

白鷺洲接大江濱。牧馬兒來動成羣。先生避世何處去。合家住近公主墳。茅屋三間倚墳腳。門戶欹斜草繩縛。籬外時聞樵婦喧。樹下每有漁船泊。先生田無一石租。糊口祇賴青囊書。春深婦子競鋤菜。水落弟兄公養魚。可憐茅屋多年破。五柳陰中留客坐。風雨淹旬不出門。先生高臥舉家餓。先生本是公主孫。當

年駙馬最承恩。馴象門西起府第。至今基址宛然存。府基荒去墳園冷。細竹寒花空滿嶺。洗菜猶傳金水橋。灌畦爭汲琉璃井。東川戰功晚始酬。駙馬還蒙少主優。靖難師來家已破。子孫旋失東川侯。奪爵猶加主國號。上書乞恩無不報。下降聞在高帝年。問安尙覩英宗詔。詔書累朝墨有光。龍牋寶篆枕中藏。主家法物一朝盡。樸素惟留駙馬床。駙馬之床樸如此。想見國初俗不侈。當時賜出椒房宮。如今鎖在茅屋裏。茅屋相看幾度春。終年抱膝不知貧。叩門半是先朝爵。失路時憐帝室親。先朝帝室復誰在。茅屋栖遲人勿怪。君不見開平王後懷遠侯。妻子負薪身種菜。

湖孰種菜歌

金陵城東湖孰村。中有隱者開平孫。通侯甲第今已矣。意氣豪華無復存。開平去今凡幾代。五王之後惟君在。往昔爭言青門瓜。如今獨數湖孰菜。問孰種菜滿畦新。一家生計只三人。終歲把鉏菜畦裏。婦能炊飯兒負薪。爲君婦亦大辛苦。嬌貴當年難比數。翟珈賜出小侯妻。珠翠裹成上公女。都人猶記嫁時粧。如雲妾媵爛生光。臺前照鏡輪梳髻。架上薰衣派管香。一朝散去竟何有。相對惟餘雙白首。早從府內厭笙歌。還向村中操井臼。村中井臼倚柴扉。賣菜還愁終歲飢。夜長不肯燃薪坐。十指侵寒綻故衣。東川子孫公主裔。妻孥行汲心常愧。聞說君婦盡傷情。無心更擬求奴婢。

同左眠樵霜鶴遊碾玉峽因懷爾止

龍暝溪水自東來。穿崖瀉壑如奔雷。山腰峽闊不盈丈。束水水急聲喧豗。水聲束急勢轉大。噴珠跳玉不肯過。激浪驚濤晝夜爭。一條飛下青山破。左生本是樵牧羣。振衣躡級欲凌雲。微我過水坐盤石。對面大聲語不聞。石頭坐久寒生粟。拄杖半染苔痕綠。想見方公此讀書。空山無人一茅屋。卽今茅屋已全傾。竹刺藤稍繞徑生。夜深或有精靈出。月白應聞嘯咏聲。飄泊遙憐方仲子。三十年來稱名士。一生作客不思歸。好山好水棄在此。

吳門晤姜如須令嗣奉詔有感

在昔同流寓。姜家兄弟賢。交深鈎黨日。客散過江年。梅福名難變。梁鴻噫不傳。淒涼逢令子。話舊淚潛然。

山居雜興

糧事聞人說。官徭果便農。儻能減科派。詎敢後輸供。僧徒施茶竈。鄰求造酒傭。今秋安水碓。借與四鄰春。

過老鶴庵

野路通精舍。山門對面疑。客從林際下。僧在竹間窺。石磴到須坐。好房開始知。師徒欣接待。剛是焙茶時。

田間草廬初成

柴扉不擇向。只對遠峯開。日月當門出。江山抱屋來。入林惟少竹。滿徑自生苔。已訂牆東友。求花密密栽。

過曾庭聞蕪陰市上

自著緇衣萬恨平。窮途遇爾轉傷情。我從嶺外經年至。君向江南何處行。瓢笠喜無鄉里識。鬚眉猶使故人驚。相持莫便當街哭。爲到郊原一放聲。

卜居

板屋荆扉半欲殘。梧陰入夏覆窗寒。親除礙瓦藤千尺。獨護穿階竹數竿。好客來多頻缺坐。新蔬炊熟苦無盤。朝飢賴得鄰僧米。欲乞朱門一飯難。

寄吳梅村

秣陵煙樹已全空。回首登臨似夢中。祇課詩篇銷晚歲。別填詩曲哭秋風。同時被召情偏苦。往事傷懷句每工。卻憶清江陽伯起。屢辭麻詔薦婁東。

吳嘉紀三十六首

嘉紀字賓賢。一字野人。泰州布衣。有陋軒詩六卷。

四庫總目。嘉紀詩風骨頗邁。運思亦復剴刻。而生於明季。遭逢荒亂。不免多怨咽之音。

居易錄。泰州布衣吳嘉紀。居東淘苦吟。不交當世。予見其爲五言詩。清冷古淡。雪夜被酒。爲其詩序。馳使三百里致之。嘉紀大喜。過望。買舟至廣陵謁謝。遂定交。

汪懋麟百尺梧桐閣集。野人家泰州之安豐場。閉門窮居。蓬蒿土室。名所居曰陋軒。終日把一卷。苦吟自娛。晚年善病。或并日一食。近海多暴風疾雨。水涌數丈。鹵地爲魚場。人絕粒。勸稱凶年。野人廬舍污窪。每歲水至。常及半扉。井竈盡塌。苦吟不輟。其

爲詩工爲嚴冷危苦之詞所撰今樂府尤淒急幽奧皆變通陳述自爲一宗近代嚴棲之作鮮有過之者鄭方坤名家詩小傳阮亭謂野人出遊後詩漸失本色不終其爲魏野楊朴今取其集讀之一卷冰雪文初終一致且野人晚節篤行潛修甘心餓死此其品概何等前說云云蓋別有爲言之也

別裁詩集源洋詩以學問勝運用典實而胸有鑪冶故多多益善而不見痕迹陋軒詩以性情勝不須典實而胸無渣滓語語真樸而越見空靈然終無名位人予持此論而衆人不以爲然然其詩具在試平心易氣讀之近人中有此孤懷高寄者否養一齋詩話吳野人詩字字入人心腑殆天地元氣所結真陶杜之衣鉢

田按陋軒古詩序事得之史公沈痛得之少陵五七律俊爽亦不失爲元遺山明末詩家可與孟貞抗行

翁履冰行

老翁履冰手挈稚孫釜甌塵積貸粟前村村農穀富莫肯念故翁別倉庾跼蹐歸路富人如虎顏色難干風壓河心骨重心酸翁泣語孫生無一可河伯應聲冰開人墮其子望見急遽來援欲引轉仆骨肉纏綿一門三世齊陷波裏飛雁哀號無手救爾

李家孃有序

兵陷郡城李氏婦被掠掠者百計求近不屈越七日夜聞其夫歿婦哀號撞壁顛碎腦出而死時掠者他出歸乃怒裂婦尸剖腹取心肺示人見者莫不驚悼咸稱李家孃云

城中山白死人骨城外水赤死人血殺人一百四十萬新城舊城內有幾人活一妻方對鏡夫已墮首腥

刀入箭。紅顏隨走。西家女。東家婦。如花李家孃。不辱強梁手。解二豈無利刃。斷人肌膚。轉噴爲悅。心念彼姝。彼姝孔多。容貌不如他。解三豈是貪生。夫子昨分散。未知存與亡。女伴何好。髮澤衣香。甘言來勸李家孃。解四李家孃。腸崩摧。箠磨滅。珠玉成灰。愁思結衣帶。千結萬結解不開。解五令下止殺殘人生。塞外人來。殊似舅聲。云我故夫子。身歿亂刀兵。慟仆厚地。哀號蒼昊。解六夫既死。妻復何求。腦髓與壁。心肺與讐。不嫌剖腹。截頭。觀者殼觶若羊牛。解七東家婦。西家女。來日撤營北去。馳驅辛苦。鴻鵠飛上天。鸞兔不離土。鄉園回憶李家孃。明駝背上淚如雨。解八

挽劉昇有序

劉昇。儀真人。歙縣潘楚玉僕也。楚玉性褊急。少違意。輒捶撻無虛。日昇不怨也。楚玉母病。昇割股肉和藥療之。楚玉死。家業中落。昇黽勉負荷。爲嫁女。楚玉之子次璜稍長。爲娶妻。妻死復娶。家益窘。昇筋骨且衰矣。乃賃於人。力作以供幼主衣食。盡瘁至死。程雲家哀之。作義僕傳。余賦挽詩。

梁肉厭葵藿。麻衣薄蒯菅。繇來棄卑賤。志士復何言。可憐一寸草。寄生桑樹巔。不自知微細。思欲庇樹根。身是主人身。何以能酬恩。撻膚不怨數。割肉不辭難。所嗟門戶衰。緩急日多端。精衛力已竭。死喪海水旁。洲渚徘徊。雲徊哀鳴下。鷺鷥在日慢。斯人鄉隣悔且傷。剖石出美玉。擘蚌露珠光。體質雖鄙陋。今日見中腸。

夏日題程梅慈洗桐圖

秋蘭娛屈子。籬菊媚陶公。如何程梅慈。乃好青梧桐。翳翳蔭林堂。蕭蕭緣澗水。已堪託琴書。還畏霑泥滓。潤聲上樹飛。林氣溼人衣。炎暉炙四野。此地陰霏霏。眼底無纖塵。心神亦清絕。翻笑穎上翁。祇令雙耳潔。

辛亥孟夏二十八日三兄嘉經歸葬東洵

二兄呼五弟。荷鋤隨我發。爾我將老死。應收三弟骨。行行見廢墟。荆棘何翳鬱。餓禽啄狸骼。野蔓牽人膝。二十八年來。始有家人跡。朽櫬在何處。形骸雜土木。肢體拾容易。砂礫亂爪脊。撥剔到天暝。全軀乃無缺。嗚呼甲申歲。兄禍生倉卒。身飽強橫手。命盡少壯日。官長來相視。行路色慘戚。磊磊聳人頭。指日白刃割。哀笳忽四起。鐵騎來萬匹。野積戰士屍。城流殺人血。羣兇出獄門。亦各操鈇鉞。依猗猛虎區。見者咸竦慄。飲恨歸去來。待時臥蓬蓽。次男名瑤琴。襁褓兄愛惜。衆謀立爲嗣。此支庶不歇。四歲離所生。命仰伯母活。不悟大人。心憐女不憐姪。綺繡擁外孫。兒也足無襪。弱膚受風霜。毳髮叢蟻虱。德極走還歸。持抱生母泣。我時實貧窘。寸心與誰說。今年兒齒壯。摧殘膺疾疾。媒妁不議婚。徭役長被責。敢望吾宗大。仍愁兄祀絕。冤魂久飄零。今日就窀穸。夔夔鄉樹近。沃沃水菱碧。死者抱痛眠。生者吞聲哭。報讐事已矣。斜陽徧阡陌。

隄決詩六首

庚申七月十四日。淘之西隄決。俄頃門巷水深三尺。欲渡無船。欲徙室無居。家人二十三口。坐立

波濤中五日夜。抱孫之暇。作隄決詩。詩成。對落日擊水自歌。境迫聲悲。不禁纍纍涕下。

今日隨人去築隄。明日隨人去守隄。颶風霖霖無休息。土溼泥流積不得。杖藜登高看水長。東舍西隣白泱泱。蝦蟆入門坐蘋上。

浮來草屋如浮萍。蟋蟀啾啾屋脊鳴。家人延頸望天曉。水作北風寒氣早。桁無衣裳麪無餐。空腸瘦骨當狂瀾。何時有暇愁飢寒。

暮年辛苦飼孤孫。黃口命依白頭存。餅餌斷絕已兩日。水中走來抱我膝。鵝鶻天上嗷嗷。歎息汝祖非其曹。不得銜汝出波濤。

漉起甕中數升黍。竈沈薪溼不可煮。家僮營營欲何適。毒蛇蜿蜒徧阡陌。高歌落日慘我顏。膠漆故舊阻河關。安知我在洪濤間。

去年夏秋雨澤絕。嘉禾枯似翁媪髮。今年天漏夏日冷。黃魚黑鯿戲樹頂。無稅無糧官長矜。胥吏用錢求開徵。以災爲豐爾最能。

劉生^岸寄我糴米貲。甑結簷頭乞火炊。炊熟欲餐轉踟躕。念生囊中錢已無。容易用錢俗所鄙。違俗更有程季子^雲。家刺船尋我漲瀾瀾。

我昔三首效袁景文

我昔客途逢敗兵。弦聲旆影魂俱驚。殘騎如狼散草莽。居人雜兔奔縱橫。漁船貪利夜賣渡。金多方許載人去。暝色潛行曙則隱。口乾腸飢我能忍。

我昔攜家亟逃難。海雲漫漫晝昏晏。野空蹶響賊馬近。我船欲速行轉慢。須臾燔燒閭里紅。風飄船入蘆港中。蘆葉菰葉蔽男婦。引衣掩塞嗥兒口。

我昔兵過獨還家。畦上憫饑多似瓜。空村無聲鷄犬盡。籬菊自放霜中花。天南伯兄天北季。驚魂棄絕故園地。夜寒鬼語聚稍稍。細雨還聞九頭烏。

晏谿送江虛中兼懷吳後莊

凜凜歲寒天。送君歸舊川。溪光浮佛舍。塔影壓漁船。客路閒雲外。家山落照邊。不愁逢酒伴。盡有賣文錢。

茉莉

深閣晚粧近。爭開羅綺前。芳馨風緩緩。採摘月娟娟。種自宜南土。根難到隔年。比來烽火靜。處處賣花船。

懷江象賢

邗江三月半。孤客此時情。病起家重憶。愁來野自行。落花關外舫。嬌女竹西箏。無數繁華子。春風送出城。

寄程仲菴

練江巖岫內。沙白葦蕭蕭。鶴髮浮孤艇。漁竿閱兩朝。嶺雲流作瀑。澗樹側爲橋。不得來攜手。思君顏色凋。

廣陵過嘉樹堂贈汪左巖孝廉

白岳白雲裏。松門石徑斜。半空飛瀑布。其下有人家。山響猿呼子。煙香樹發花。幾時隨我友。仙境醉流霞。

送王黃湄之海陵

是我還家路。扁舟汝獨行。千人初短氣。去國各含情。海水孤城暗。霜風一雁鳴。此鄉稱僻壤。誰更識虞卿。

宿從容菴

老僧借宿處。窗對大江開。茆屋無門戶。寒潮夜去來。火明揚子渡。鐘動妙高臺。蕭瑟憑風雨。繩床有舊醅。

晚發白沙

黯黯雲垂野。喧喧浪激沙。黃昏初放艇。白首正思家。江戍聞寒柝。漁燈見宿鴉。飛蓬真似我。歲晚更天涯。

附程翼士舟歸東洵作

客久吾逾拙。囊空汝倦遊。故鄉無百畝。壯日盡孤舟。村吠隔花犬。溪飛衝雨鷗。相攜應不厭。同是敝貂裘。

九日同夏五作

風雨朝如晦。乾坤日用兵。秋魂聽鬼哭。老眼看人爭。榛梗方爲害。東南稍輟耕。吾家二十口。溝壑正關情。

送人歸黃山

入雲山路碧重重。歸去追隨石戶農。幾畝秫田今有主。一間茆屋在何峯。煙崖芝草衰年採。雪嶺樵人落

日逢悵望浮邱蹤迹遠。鍊丹臺上倚青松。

內人生日

潦倒邱園二十秋。親炊葵藿慰余愁。絕無暇日臨青鏡。頻過凶年到白頭。海氣荒涼門有燕。谿光搖蕩屋如舟。不能沽酒持相祝。依舊歸來向爾謀。

九月四日吳雨臣見過

俱是先朝戊午生。相知端不爲同庚。黃塵戰伐無年代。白首漁樵此弟兄。萑葦人稀雙雁下。茱萸節近一溪晴。疏籬陋室秋光在。莫厭頻來酒共傾。

舟中九日

過節淒然病裏身。強披敝褐對江津。初霜白雁隨遊舫。故國黃花怨主人。幾度登臨成老大。半生飄泊喪精神。干戈滿地親朋遠。愁見茱萸刺眼新。

送方爾止

出郭朔風吹敝裘。亭臬東望使人愁。隋宮綠酒離前飲。魯國青山老去遊。寒雁背羣飛夕照。霜砧何處搗殘秋。欲攀隄柳增惆悵。黃葉蕭蕭落馬頭。

舟中贈王子蕃

萍蹤空傍水邊鷗。鷗自忘機我自愁。歲儉業蕪皋廡下。天寒人在楚江頭。渚風亂聒羣飛雁。野日斜熏獨去舟。時晏路長多謝汝。酒錢攜共老夫遊。

送劉希岸歸呂四場

逸興應知中路增。紫琅碧漢樹層層。偕僧松壑霽浮櫂。乞火竹爐寒煮冰。萬里潮聲江海合。千尋石路杖藜登。何當共宿翠微裏。夜半開門看日昇。

過金山

屢向征途見此山。興來維艇一躋攀。忽開襟抱魚龍際。況載尊罍水石間。吳楚千年流白日。風塵半世損朱顏。留雲亭上人微醉。坐看江帆暮往還。

東歸道中

人煙四望稀。野雲不見路。歸鴉與暝色。稍稍隋宮樹。

冶春絕句和王阮亭

雜管繁絃奏野航。聽來聲調是伊涼。邊關子弟江南老。今日曲中逢故鄉。

送吳仁趾

秋山遶郭儘堪遊。暮宿城西孫楚樓。後夜酒醒思舊伴。烏啼殘月不勝愁。

慰隣人盧慎年七十無子

須知嫠獨易相存。積雨家家水入門。凶歲形容魚鰓笑。人生怨殺有兒孫。

王翊二十七首

翊字介人嘉興布衣有秋槐堂集

構李詩繫秋槐老人家故業染一手挾書一手數錢與布販菜傭相應答好製詞曲作紈扇記。忌者誣以詆毀里紳訟之官家計日落然詩日益有名。

靜志居詩話介人初擅詞曲後研聲詩志取多師不遺僞體其論詩於合處見離於離處求合啓禎之間大雅不作毅然以起衰自任而知者寥寥惟平湖陸職方崑崙心賞之嘗訪君於長水值君洗硯河頭挾之登舟家人不知也。遍遊茗壺乃返既而入越謁陳推官臥子方置酒送客君詩有前路夕陽外行人春草中之句臥子擊節曰此今之高三十五也爲序其詞遭亂所居不戒於火惟餘小屋二間一供婦饌一吟詠其中有故人官府寮者造之不見尋卒於京口五言如江湖長至日風雪上方山驛路通秦遠峯陰入晉多。桃榔千樹雨瘴霧百蠻天日氣淫秋雨嵐光變夕曛楓林依水盡雲物近秋多一二故人在飄零佳訊稀江山雄白下人物近黃初山雪行人少江梅臘月多文章身後事邱隴夢中山白社違人日玄關閉子雲江山開一望吳越在孤舟七言如夜月旌旗五馬渡秋風草木八公山周道秋風行黍稷漢宮春雨長蒲陶西蜀諭通司馬檄中山謗滿樂羊書秦塞忽驚三月火漢家空待貳師功三月晴風高戰鼓九江春水下樓船鑄語高華此方虛谷所云律體也。明三十家詩選介人詩冲澹處似襄陽深婉處似龍標沈摯處亦似少陵禾中詩人自清江巽隱以後竹垞以前此其卓然成家者也。

田按。鈕玉樵觚賸云。介人攜詩囊過鄱陽湖。以文得罪湖神。遇羣盜搜介人篋。得詩稿四五帙。怒投於湖。及歸。得詩餘百闕。緘之藤笥。到家發視。諸物不改。而詞稿碎如刀割。迎風片飛。無完紙矣。然則今之所傳者。盜擲神碎之餘也。

猛虎行

北山猛虎行斑斑。夜出索人晝不還。路無行人食不足。只向山中守麋鹿。可憐日久麋鹿窮。猛虎亦死深
山空。

無可奈何曲

吳姬白皙妖且妍。雙鬢墮馬如雲偏。流波宛轉情遷延。琵琶暗撥鴛鴦絃。月華照夜明蒼煙。爲君酣歌樂
當年。勸君莫惜黃金錢。明朝花飛月亦沒。青塚家家泣枯骨。

孝陵

鍾山石屑屑。冬夏積冰雪。松柏纏陰森。熊羆護巖穴。鼎湖龍去遠。弓劍闕幽闕。惟皇挺熙運。奮起秉黃鉞。
一揮破蘄黃。再舉奠吳越。羣雄空鬪爭。所遇皆殄滅。赤手造區夏。率土賴重活。謨烈貽後人。大誥昭史策。
燕雲旣殷遷。豐沛猶漢業。至今龍蟠基。王氣殊未歇。臣也章野人。不易窺聖域。艱難入都來。未敢忘一謁。
精靈儼如在。杳冥心目懾。梓殿凝玉芝。隧道隱丹霓。萬禩翼休明。神哉報豐潔。

秋夜遣懷

八月天氣清。草堂轉深僻。長河流素影。遙遙瀉空碧。落葉盈寒皋。繁星爛秋夕。蕭風吹微月。竹露夜深白。偃蹇獨往來。悅焉慕疇昔。

北歸後得友書感賦

長夏風日炎。南歸且散髮。每懷故人好。索居又彌月。書來道相思。殷憂喜初豁。對使詢近事。一一言婉切。別後盜賊多。入徐恣衝突。州民百餘里。大半遭慘殺。倉卒聞此言。心膽幾若割。向使久羈旅。焉能至今活。生還有餘幸。悲歌守饑渴。縱使委溝壑。亦已欣後沒。干戈滿天地。原野厭膏血。裁詩雪涕淚。痛定轉嗚咽。

游弢光

西山鬱奇姿。茲峯實爲最。孤根生虛無。時與雲雨會。密竹青連陰。白日半成晦。泠泠多澗泉。清響落山背。曾聞住高僧。卓錫自何代。至今松林中。飄風墮殘喙。我來值秋初。炎暑猶未退。迴盤到諸天。勦男慎所戒。歸途已蒼茫。想像白雲外。

顧山人貽畫賦贈

東風吹花隱蠟屐。臥起初聞叩門急。手持一卷花外來。宿昔知名武林客。君之手腕蓋有神。耕煙注墨生空雲。蕭疏幾筆起纖末。俄頃忽見山嶙峋。圓峯皴石石苔古。疊石成巒介平楚。葉重霜流遠勢寒。沿溪茅屋深宜補。君家虎頭不可得。阿瑛以後君無敵。蕭齋風日正佳時。畫裏看山幾重色。

荒原

荒原秋草積。緩步獨行歌。野水同天盡。寒煙入樹多。此生嗟老大。滿眼又干戈。北望風塵合。驚聞旅雁過。

與范尊甫

十年成往事。長嘯激悲歌。搖落當秋甚。蹉跎奈老何。風塵孤劍冷。天地一身多。更念幽居者。衡門掩薜蘿。

寄內

白門楊柳樹。蕭颯在江關。故國幾回夢。清秋千里山。遠懷應有淚。久客且無顏。歲晚愁歸計。冰霜道路艱。

渡錢塘

水驛渺難求。風帆颯未收。江山開一望。吳越在孤舟。客鬢逢秋換。鄉心近暮愁。浮沈無限事。觸目羨沙鷗。

冬日

蕭條西北風。吹斷北來鴻。歲月客程晚。冰霜天宇空。有時歸夢裏。盡日處愁中。昨夜傳鄉信。烽煙又浙東。

清河縣

小縣無城郭。河流到縣門。客舟經近市。漁網集空村。饑饉年頻告。逃亡屋半存。惟餘譙鼓在。猶是警黃昏。

薊北

薊北十年來。烽煙暗不開。秋高邊馬健。風急塞鴻哀。白髮將生鏡。黃金未上臺。徒憐憂國計。長屈幕中才。

登北固甘露寺

凌雲亭畔倚崔巍。明滅維揚望裏開。南國至今遺寺在。西風不盡大江來。日生滄海凌晨見。潮過金山向晚回。指點孫吳舊時事。馬蹏石迹半蒼苔。

竹夜

林風吹竹竹露微。幽人隔竹開柴扉。星河夜宿草堂靜。蟋蟀暗吟秋月輝。疏鐘杳杳坐來歇。流螢奕奕停還飛。石床一枕破清夢。寥落半生無是非。

雜感三首

縱矢彤弓寵錫頒。北門鎖鑰動江關。武侯師出名尤正。太傅功成鬢未斑。夜月旌旗五馬渡。秋風草木八公山。金湯萬里生民寄。麟閣期登指顧間。
長城萬里羨當年。楚澤軍威蓋世傳。三月晴風高戰鼓。九江春水下樓船。韓彭心事應難論。李郭功名不易全。漫道勤王師獨正。江南處處起烽煙。

三十家詩選。澄懷云。此詩似指左良玉。

淮海聊寧燕雀居。風高鼓角建牙初。寒凌畫戟秋陰重。雲壓孤城夕照虛。西蜀諭通司馬檄。中山謗滿樂羊書。將軍面矢誰堪敵。樽俎論功計已疏。

秋怨

芙蓉花落水無香。南國秋來夜有霜。邊月只將離夢遠。相思河外是西涼。

金陵懷古二首

煙草萋萋野色新。晚來驅馬見行人。不知何處含章殿。滿地梅花雪外春。
寒江秋水盡無塵。棲隱當年有二倫。爲問山中明月夜。草堂猿鶴怨何人。

會稽竹枝詞

秋風秋雨正淒淒。荷葉荷花香滿溪。越女蕩舟愁日暮。歌聲盡在若耶西。

宮詞三首

上林春酒盡醍醐。醉倚新恩倩帝扶。翠輦不登遮袖去。兩行銀燭盡宮奴。
禁中春樹藹晴煙。朝報簾聲下九天。官局進呈新鑄好。六宮齊賜草書錢。
十里芙蓉內院秋。涼風先到殿西頭。君恩不是銅溝水。那得深宮處處流。

揚州

香璜珠匣閉黃沙。泉下依然望翠華。芳草離宮三十六。春風吹滿玉鉤斜。

明詩紀事卷十一

辛籤

屈大均四十首

初名紹隆，字介子。番禺諸生。鼎革後，去爲僧，名今種，字一靈。返儒服，更名大均，字翁山。有翁山詩集八卷。

池北偶談：屈翁山少爲諸生，有聲。旋棄去，爲浮屠。久之，出遊吳越，又數年，忽加冠巾，遊秦隴，與秦中名士李因篤輩爲友。作華嶽百韻，固原守將某見而慕其才，以甥妻之。翁山愛玩少室，賦詩云：同樓紅翠三花樹，對寫丹青五嶽圖。自固原攜妻至代州，上谷，再遊京師，下吳會，自金陵歸粵，妻隨病死。其詩尤工於山林邊塞，一代之才也。

王猷定四照堂集：屈五賦實旣超，選材亦別。餘子在人海和酬，處士獨拔地作空中語。

靜志居詩話：翁山早棄儒服，託迹緇藍，予識之最早。其詩原本三閩大夫，自王逸以下，多屏置不觀。後復返儒服，入越，讀書祇氏寓山園，不下樓者五月，始具曹、劉、班、左諸體，要之七言，不如五言。五律勝於五古，至歌行長句，可無取焉。

廣東詩粹：一靈自謂五律可比太白，而氣體亦多似杜。

田按：翁山五言詠古詩，突兀奇崛，多不經人道語。七律雄宕豪邁，五律倚妙圓轉，一氣相生，有明珠走盤之妙。與區海目後先合轍。

詠古四首

神堯愛二女。盡以歸重華。長者爲女君。容顏如朝霞。少者爲夫人。亦若扶桑花。衫衣被南風。琴歌何紛葩。朝同蓬萊宮。暮去瀟湘涯。帝旣崩蒼梧。妾亦捐長沙。神光兩不離。月以日爲家。

維昔二周君。皆以誅秦亡。大義帥諸侯。王朝就有綱。惜哉無良將。九鼎歸咸陽。是時秦亦滅。嫡裔止莊襄。政也實姦生。呂代嬴氏興。二世不旋踵。趙高撼其吭。前秦祖蜚廉。後秦祖文信。無德易傾覆。虎狼總推刃。詩書亦何罪。儒生同一燼。痛絕驪山坑。多言說堯舜。

峩峩太華山。上有四毛女。苟非逃學仙。從死成黃土。光光人魚膏。泉下照歌舞。淚作水銀海。腸爲黃金縷。秦時女高士。麗英與爲伍。翩翩金精峯。相逐有毛羽。

漢帝亦多情。酒酣思猛士。悽悲大風歌。辭與招魂似。韓彭皆已亡。慷慨不可止。泣下爲淮陰。非是悲遊子。刻薄鐘室誅。終古帝王恥。忍以英雄人。以與兒女子。

過大梁作

浮雲無歸心。黃河無安流。神魚騰紫霧。蒼鷹擊高秋。類此雄豪士。滔滔事遠遊。遠遊欲何之。驅馬登商邱。朝與侯嬴飲。暮爲朱亥留。悲風起梁園。白草鳴鸚鵡。揮鞭控鳴鏑。龍騎如星流。超山逐羣獸。穿雲落兩鷲。歸來宴吹臺。酣舞雙吳鉤。驚沙翳白日。垂涕向神州。徒懷匹夫諒。未報百王讐。紅顏漸欲變。歲月空悠悠。

望五老峯

飛翠如煙雨。秋來山色濃。夕陽一返照。明滅金芙蓉。獨嘯此亭月。將尋何處鐘。石門精舍近。早晚巢雲松。

開光寺樓作

向夕樓中臥。天風忽起西。不知吹瀑水。飄落幾重谿。牕小雲爭入。林深雪已迷。無人愛幽獨。來共聽猿嘯。

從軒轅宅入迷居洞

曉起蕊珠峯。行行花影重。林鳥飛落月。山鬼嘯寒鐘。野飲芝泉冽。秋衣竹翠濃。昨宵逢道士。疑是七星松。

松林

松林二三里。掩映帶平沙。煙火不知處。茅茨時一家。野衣無數葉。山鬢絕多花。樵路隨春草。盤盤上嶺斜。

寄何子

病裏知秋早。涼風生鬢絲。夢隨林葉落。心與海雲遲。明月不長滿。青山空有期。斜陽在南浦。每憶送君時。

馬陵

俯挹中州盡。河山表裏來。天懸句注險。水割孟門開。一笑雄圖失。長歌故國回。遙從狐突廟。直下馬陵臺。

寄桐岑子

雨雪悲年暮。山川愛浙東。平生一明月。飛入鏡湖中。白拂懸天柱。清琴響碧空。期君揚帆至。相接有樵風。

避何子往桂林

桂林襟五嶺。山盡翠成嵐。去逐湘江北。歸從灘水南。故人待徐孺。太守是嵇含。巖穴多句漏。行春共玉驂。

遊太倉張氏學山樓

城裏多邱壑。名園更學山。何來峯十二。風雨恐飛還。抱石雲長冷。流花水不閒。人疑太湖上。銷夏第三灣。

入秋鄉江作

欲雨水風起。白雲初滿船。秋鄉多落葉。一半逐流泉。白鳥一溪影。人家幾處煙。片帆平嶺過。驚起鷓鴣眠。

寄蕭山張杉

聞君白魚潭。蘆花秋半含。持竿皎月下。沽酒寒溪南。我欲遊天姥。因之結草菴。會當遣雙鶴。來此迎蘇耽。

重至白門宿余鴻客山堂作

白下嘯烏地。愁人自六朝。秋聲將落葉。此度益蕭蕭。山鬼弄魂夢。草蟲悲寂寥。那知垂老客。有道在漁樵。

琴臺

二月春風發。梅花滿洞庭。美人乘畫舸。采采入香溼。潮生胥口白。雪盡莫釐青。何處弔西子。琴臺碧玉屏。

桃溪

夾岸蒙茸竹。枝枝有鳥嘯。夢飛芳草外。愁在夕陽西。水驛連三峽。人家各一溪。女郎祠畔望。煙雨一秋迷。

綠樹

江南芳樹滿。色似水波鮮。一半爲楊柳。風吹綠漲天。長因新葉好。益念故花妍。黃鳥藏何處。聲聲總可憐。

自胥江上峽至韶陽作

六六玉芙蓉。鳴琴知幾峯。如何百蠻狩。不遣二妃從。絕徼餘城闕。荒祠尙鼓鐘。月明瑤瑟至。應渡水雲重。

浮湘

兩日隨蘭漿。青青紫蓋峯。五峯江倒映。水底盡芙蓉。蒼翠楚天好。微茫湖口重。洲邊采香草。湘女暮相從。

繇來曲

霜鬢欲成絲。多因生別離。無情是瑤瑟。未及曲終時。魂夢滿三楚。雲山紛九疑。天邊無限樹。總是一相思。

唐晉王祠暮

何代丹青妙。雄姿動武皇。精靈猶白日。弓劍已秋霜。石馬嘶風急。沙河繞塞長。應州金鳳井。霸氣共蒼蒼。

王有畫像。武宗取入大內。

懷同岑

空翠洞庭陰。松風吹滿林。白雲不可見。日與數峯深。聞在毛公洞。時時拂素琴。秋來摘朱橘。霜露溼衣襟。

惡少

長劍短刀鋌。幽并惡少年。馬頭懸落日。鷹眼射高天。並飲桃花店。齊彈白紵絃。胡姬量酒罷。調笑索金錢。

送顧寧人

雁門北接常山路。爾去登臨勝概多。天上三關橫朔漠。雲中八水會渾河。飄零且覓藏書洞。慷慨休聽出塞歌。我欲金箱圖五嶽。相從先向曲陽過。

杜曲謁杜子美先生祠

城南韋杜瀟川濱。工部千秋廟貌新。一代悲歌成國史。二南風化在騷人。少陵原上花含日。皇子陂前鳥弄春。稷契平生空自許。誰知詞客有經綸。

金山口恭謁天下大師墓

讓帝飄零海嶠東。龍歸猶識未央宮。風雷豈敢疑周日。禾黍何當怨狡童。父老爭迎靈鷲錫。山河如棄鼎湖弓。傷心陵墓無封樹。秋草離離白露中。

平臺

在天壽東山口內一里。成祖嘗駐蹕焉。嘉靖十五年命作亭於上。名曰聖蹟。十七年四月駕幸平臺。祀成祖於臺中。

翠輦紅旗去不還。平臺一片朔雲閒。宮邊流水通諸口。陵後黃花控二關。俎豆中宮修漢臘。松楸南國慘天顏。玉環何日歸廷尉。流落龍沙戰血斑。

宣府道中

花園北抵鴛鴦灤。一路闕氏往蹟多。恆嶽白雲連上谷。桑乾春水接洋河。紫髯日市牛羊入。紅粉時吹籟。築過此度關山無內外。漢時空費羽林戈。

宣府弔古

遼后宮臨鎮朔臺。明君祠傍拂雲推。天寒鷹隼三關落。日暮牛羊四野來。幾日玉鑾榆木返。無邊毳帳上。都開遼東一臂連。宣府誰使寧王罷鎮回。

大同作

飲馬東連白道泉。桑乾西接紫河煙。何年代邸淪秋草。幾處秦城出遠天。事去英雄羞一劍。時來遊俠喜三邊。哀笳莫奏思鄉曲。都尉臺前月正圓。

采石題太白祠

才人自古蛟龍得。太白三閩兩水仙。詞賦已同雙日月。精靈還作一山川。江間絕壁丹青出。木末飛樓俎豆懸。千載人稱詩聖好。風流長在少陵前。

墨胎

九世商侯是墨胎。盟津肯爲武王來。千秋書弒堪爲法。一代無臣正可哀。灤水風悲孤竹里。首陽雲掩采薇臺。黃農虞夏歸無處。多事天生十亂才。

見月有懷

知爾城南婦。愁心欲寄難。故將樓上鏡。懸與藁砧看。

湖上

春草接姑蘇。春煙望漸無。愁心與春水。流滿莫愁湖。

寒食

煙雨催寒食。江南又暮春。可憐三月草。看盡六朝人。

天邊

天邊明月迴含霜。夜夜哀笳怨望鄉。一片愁心與鴻雁。秋風吹不到衡陽。

客雁門作

三年作客傍淖沱。聽盡哀笳出塞歌。白髮不驚明鏡滿。秋霜只怨雁門多。

陳恭尹三十四首

恭尹字元孝。廣州順德人。侍郎邦彥子。有獨漉堂集七卷。

彭士望恥躬堂集。獨漉堂詩。諸體兼擅。手觸肩倚。莫不中音。意格渾成。發人神悟。

漁洋詩話。南海耆舊。屈大均。翁山。梁佩蘭。藥亭。陳恭尹。元孝。齊名。號三君。元孝尤清迥絕俗。如離憂在湘水。古色滿衡陽。映花

踏路閉。漱水石根虛。桃榔過雨垂空地。玳瑁乘潮上古城。家山小別吟兼夢。水驛多情浪與風。皆得唐人三昧。

居易錄。元孝寄余詩。素南海集云。酷似高人王右丞。在官蕭散意如冰。時名兄弟堪方駕。家學文章自一燈。滄海乘槎曾獨到。越山懷古記同登。南來新詠多如許。紙貴衡陽寫未能。予乙丑別於佛山。今六年矣。元孝詩如積雪迴孤棹。寒湘共此心。積雨江漢綠。歸心楊柳初。三徑草生殘雨後。數家門掩落花中。皆唐賢佳句也。

靜志居詩話。元孝降志辱身。終當進之逸民之列。其自序略云。志學以往。皆爲患難之日。東西南北。不能多挾書卷自隨。而意有所感。復不能已於言。故於文辭。取諸胸臆者爲多。而稽古之力。不及其辭。可云不自滿矣。論其詩品。雖稍遜於翁山。然翁山祇工五言。又不若元孝之諸體相稱也。

張維屏聽松齋詩話。詩以沈爲極詣。沈不在貌。其骨重。其味厚。其氣蒼。其韻長。乃謂之沈。梅村獨漉之詩。皆沈。梅村沈麗。獨漉沈學。

田按。元孝詩。溫雅有則。身際滄桑。多感憤之言。而音調仍歸和平。則澤古者深也。

瑯琊王歌

寶馬鳴春風。馬上人如龍。下馬道名姓。言是廣平公。

行路難

君不聞蜀山多陰稀。見日羣犬吠之盈萬室。又不聞野人有婦一目偏。出見舉世皆不妍。是非好惡何有定。昨者高岸今爲淵。勸君且自酣盃酒。勸君不用狂開口。正言自古有戈矛。上士聞之皆卻走。

感懷二首

事君如四時。成功者爲客。君子慎其言。祇以求忠益。小人躁於名。噉噉沾其直。疾疾卒不除。上下成乖隔。爲臣固當戒。爲君獨宜擇。曲突弗先圖。頭額爲焦灼。忠言有如鴉。佞言有如鵲。鵲鳴人所喜。鴉鳴人所惜。覽鏡在中夜。莫辨影與形。人苦不自知。所賴友與朋。圭璧貴攻瑕。龍阿朝發硎。如何末世士。懷利忘平生。責望疑似間。讒間忽然興。陳張交里門。白刃王侯生。富貴尙相負。貧賤甯相能。結交始以義。全交終以明。安得兼黃金。以鑄鮑子靈。

雜詩

商風自何來。白雲起秋色。梧桐一下葉。百卉萎未息。天地方疾威。美者先受抑。捐生故有人。困餒焉足惜。豐此百年軀。祇爲螻蟻德。

遊七星巖

立馬眺平蕪。蕭蕭見蒼壁。不知何處雲。飛作茲山石。嵯峨各異勢。紛詭非一色。旁通類戶牖。中虛成室宅。藤杞上鬱盤。石乳下涓滴。時聞鐘磬鳴。宛若仙源隔。靈峯互蔽虧。微徑緣空隙。頗疑混沌初。有此機巧迹。遨遊茲已屢。歲月真如擲。川原無古今。世事空疇昔。徘徊倚層巔。北風感行客。

登羅浮

八桂祕南經。雙山雄粵望。偉哉昔所聞。於今覩其狀。彌天列青靄。絕地聯層嶂。掩萐草木平。陂陀谿谷壯。

誰言盛積阻。極目何超曠。雲巒時絕續。泉聲日奔放。飛樓候朝暎。倒影排溟漲。相傳蓬島來。曷知陶唐尚。事往誠莫稽。迹湮理無妄。擣禽應白杵。暗虎懷仁讓。蟲書篆符竹。蜺化遺衣桁。翳維羽人宅。信此餘風暢。陰崖饒異產。神藥茲靈藏。名遺炎帝書。類絕嵇含訪。伊昔休明會。位與王侯抗。時勤玉璽封。未味高山嚮。望秩禮久虛。旱魃人猶仰。我來仲夏月。溽暑陽方亢。臥聞夜來雨。飛出龍池上。何因需九州。蒼生企靈睨。

沖虛觀

浮生無百年。脆質今二毛。言尋仙人居。焉憚登陟勞。褰衣遵澗曲。輟棹逾平皋。輕風澹餘雲。仰見巖岫高。眞宮廠峻宇。飛陛凌層霄。羣峯列垣墉。衆壑深溪橋。石池曜紅蕖。乳竇凝金膏。緬懷著書人。丹書樂南交。幽洞俯日月。天路流雲璈。慮釋神必凝。理得形自超。安知後來者。澹蕩非吾曹。

西樵遲蔡長若

朝起望山路。雜花虧蔽之。日暮有來人。而非心所思。子行亦不遠。日歸何乃遲。清溪日澹濯。猶恐衣裳淄。柏舟行爲區母陳太君賦

太君。愧我陳太夫之女也。許適見五區大夫之子寶宸文學。文學早卒。太君當未笄之年。矢靡他之節。于今五十矣。同人嘉其志有成。繪圖爲祝。予旣爲之序。復作此歌。

柏舟兩鬢猶可儀。陶嬰黃鵠曾雙飛。夫人爲婦已頭白。眼中未識君容輝。自言生長大夫女。經史胸中炳。

如炬。父母有命兒有心。縱不言承已心許。心期頡頏同一林。天教殊絕成辰參。人生意氣貴一諾。妾能負天不負心。妾父有男妾有姊。君家大夫君一子。有妻於俗得立孤。無妻爲殤終已矣。素車白馬入君門。繇來爲義非爲恩。身安分命甘如齋。半生衣枕無嘯痕。當年十五今五十。嗣子成立皆有孫。嗚呼陷胸絕脰死容易。就義從容人所畏。青閨冉冉盛年徂。誰能誓死終不渝。千金之劍贈樹墓。至今談者猶區區。何況贈以千金軀。乃知未仕報韓者。古今所以爲丈夫。

發舟中湘將登南岳

芳草綠未已。孤舟發南湘。還當上巳日。遠適衡山陽。石積水光碎。竹多風響長。客途春有酒。波蕩感浮觴。歸舟

積雨江漢綠。歸心楊柳初。芳菲空復爾。少壯已全虛。白髮何難得。青山不易居。從今向田里。所懼世情疏。游尹瀾柱銓部園林

曲渚平無浪。扁舟晚不歸。如何垂綬客。亦有釣漁磯。天月欲隨我。水雲微上衣。小童輕把棹。莫使白鷗飛。贈袁偉振林叔吾

珊瑚洲畔柳。可以贈依依。自我此爲客。而君遂不歸。夜吟銷畫燭。春雨共寒衣。未別先惆悵。他宵明月輝。次鳳陽逢中秋

未到問沽酒。早投城北闕。莫令亡國月。得照淚江人。世薄功名士。秋銷戰伐塵。餘生付樽杓。留醉上車輪。
漫興

借屋增江口。悠悠十八年。力窮羣籍內。身老衆人前。曲巷來風滿。閒門得月偏。有生同是寓。終戀墓邊田。
冬草

無論南與北。一種白連門。豈不怨遲暮。會承天地恩。遠風疏勁葉。春色聚寒根。獨立觀元化。悠悠何所言。

藤簾

一片燕山雪。千枝海上藤。結爲幾萬字。字字續成冰。縷結長欺髮。光寒不集蠅。暑天南地上。從此絕炎蒸。

八月十夜泊舟長淮關懷故園別者

長淮今夜月。此是故人心。萬里送行者。徘徊楓樹林。維舟悵前浦。把酒戀同斟。自我不相見。知君愁至今。

送滌上人

滌公到城久。忽憶邱中琴。積雪迴孤棹。寒湘共此心。獨歸紅樹外。相待碧雲深。借問茅菴路。衡山在隔林。

葉世穎重之中湘茅屋行後有寄

楚國木葉下。西風行有霜。離憂在湘水。古色滿衡陽。幾日歇蘭棹。此時開草堂。山川教兒子。指點洞庭傍。

同何不偕梁器圃魏和公梁藥亭陶苦子宿靈洲山寺柬王說作王大雁

靈洲秋色淨無煙。水市山隅浪市天。落日客尋江上寺。出林僧放月中船。漁依別港燈侵閣。鶴宿高巢影在泉。欲與故人同夢到。夜來吟咏不成眠。

寄程周量

薇省仙郎安好無。別來三見落庭梧。西風不盡雁初下。明月相思天一隅。內詔寫歸金鳳紙。新詩擘出木難珠。故人落魄南江上。穩繫藤蓑作老夫。

送家中洲之青原訪藥地禪師

老依江徼謝名稱。門徑蒼苔日漸增。遠興忽生黃菊節。舊心期對白頭僧。吟過曉岸風千樹。舟並寒山夜一燈。想到吉州攜手地。石橋新瀑半爲冰。

夜起西山草堂口占別吳又札梁顛若梁亮圃

無成三十老漁蓑。舊國深慚此屢過。生計未知何事好。詩篇惟覺別人多。高城曉角收涼月。歧路西風長白波。猶幸交親不相棄。夜燒銀燭爲悲歌。

發舟寄滿用階鍾裴仙滿天石

扶胥古渡水淒淒。雨後移舟望轉迷。數口寄居秋草外。一身爲客水雲西。家無兄弟依良友。地夾河山畏鼓鼙。知己片言應不負。亂離妻女藉提攜。

送任克家歸皖江

楚國千峯入小樓。闌干環映大江流。夢中明月經年別。歸興吳山昨夜秋。菊徑乍開人並上。秫田多熟酒新篘。家園樂事遙堪羨。作賦潘郎未白頭。

夏至夜卽事

初晴天氣便炎蒸。小閣風多最上層。臘酒舊藏椎髻婦。春茶新惠住山僧。頻探落月移湘簟。自惜流螢掩夜燈。一歲算來今夕短。老夫猶爲幾回興。

鄴中

山河百戰鼎終分。歎息漳南日暮雲。亂世姦雄空復爾。一家詞賦最憐君。銅臺未散吹笙伎。石馬先傳出水文。七十二墳秋草遍。更無人表漢將軍。魏書明帝紀注張掖柳谷口有開石得五馬文曰大討曹此魏晉代興之符也

聽松齋詩話獨漉先生七律尤多傑作鄴中懷古一篇議論含蓄鏗鏘自然七律到此地步所謂代無數人人無數篇者也

明妃怨

生死歸殊俗。君王命妾來。莫令青塚草。生近李陵臺。

江上曲

雙蛾畫不成。十五背孃行。獨自搖蘭槳。橫塘看月生。

東湖曲二首

大石樓連小石樓。上樓遙見珊瑚洲。洲邊花豔誰家女。笑擲紅菱打白鷗。
垂楊橋晚歸人小。近水亭高遠岫孤。正是郭西難畫處。淡煙疏樹似倪迂。

陳子升三十首

子升字喬生。南海人。侍郎子壯弟。弘光時。以明經舉第一。隆武改元。拜中書舍人。桂王時。拜吏科給事中。遷兵科右給事中。有中洲草堂遺集二十六卷。

有學集。喬生學殖富有才筆。日新以風雅爲第宅。以騷選爲苑囿。繡繡悽絃。蒙榮集翠。南海文忠公盱衡告余。有火攻伯仁之歎。

靜志居詩話。喬生古詩愛仿玉臺金樓。五律規摹太白。浩然時有單行之句。然其心摹手追者。區海目也。順德薛始亨岡生序其詩云。洪永成弘迄今。天下之詩數變。獨粵中猶奉先正典型。自孫典籍以降。代有哲匠。未改曲江流風。庶幾哉才術化爲性情。無媿作者矣。此善言土風者。

梁佩蘭六疊堂集。中洲先生詩。有時空諸所有。有時實諸所無。有時高唱入雲。有時舟迴蕩漾。有時天然頽放。有時簇錦攪花。間或嗜險。編奇。畢竟雅人深致。

田按。喬生早擅才華。晚歸閒寂。集中諸體。各有擅場。五律尤有明珠走盤。彈丸脫手之妙。

短歌行

有酒盈樽。嘉賓在門。直須延坐。庭光已昏。悲當用歎。唇亡齒寒。魯酒伊何。園彼邯鄲。瓶之罄矣。惟鬻之恥。人生何爲。憂來不已。蕭蕭暮風。吹我欄櫳。悲滿君懷。醉顏不紅。交交好禽。枝間好音。胡不如鳥。人各有心。鶯嬌始簧。燕狂以睂。斷鶴續鼻。云胡短長。琴則可歌。笙則可吹。惠而好我。與子同衣。

行路難

我奏瀟湘二妃之寶瑟。西母白雲之仙謠。易京君明之龍笛。秦臺弄玉之鳳簫。君家堂中旣浩侈。洞房複帳留相調。中有一人字白雪。鳴蟬兩鬢鳳凰翹。未許千金韓挾彈。徒逢十八賈登朝。寶帳三千萬阿那。使君五馬躡蹀驕。珊瑚懸鉤出海底。自言寡向上宮要。妙聲絲竹迭無間。羅帳忽已從風飄。翡翠窗疏眉語度。蓮花帶弱精魂搖。繁郎區區復叩叩。荆王暮暮復朝朝。金卮滿飲稱旣醉。思君此事非松喬。人生壽命當有盡。焉如聖匹望河橋。

雙鏡辭

照鏡欲照雙。雙鏡莫當窗。窗前花復柳。鏡影殊難偶。一鏡見妾容。雙鏡見妾背。鏡尙見妾背。妾面郎安在。雙鏡亦徒然。破鏡飛上天。

感遇

百年能幾時。何不逍遙遊。欲絕塵土迹。且居明月樓。高情屬遙漢。延睇舒層邱。待我凌雲翔。與子談九州。

玄幕山探梅

寒浦入輕舟。春山引孤策。煙開見飛鳥。雪澹無形迹。仄徑援山臂。高根逗泉脈。旁臨鄧尉卑。迴望閭門窄。日照寺微紺。湖涵梅盡白。諸天萎花供。大地成香席。石壁張丹青。茶山啜雲液。悠然遂終日。歸路思彌釋。

屈道人歌

雲中龍變化。隱隱見其鱗。支公與林師。髣髴云一人。方袍白足采蘭蕙。僧伽未必非靈均。屈上人。天下士。雜佩芳菲吾與爾。遠遊高舉今在此。只今吾見化鶴歸來之蘇耽。誰解昨日出關猶龍之老子。

昌華苑

南漢風流地。芳湖曲帶潮。芙蓉依殿腳。楊柳近宮腰。一往多疑塚。千年不復朝。空餘化螢草。霧縠彩虹橋。明妃怨。

物色歸驕虜。蛾眉鎖獨顰。遷延上馬地。決絕貫魚人。簷築風相切。琵琶語不真。君王有飛將。妾有玉關塵。上巳海日山禊飲。

羽觴何處流。飛渡羽人邱。斗酒黃鸞語。山枝青翰舟。春叢煙霧氣。波蕩古今愁。楚水長相接。言歸芳杜洲。寄無可大師。

平生皖城友。當世白蓮師。金策搖何處。碧雲愁暮時。月臨無盡界。鳥擇最高枝。同病還同老。浮沈愧所知。

黃石公祠

素書傳孺子。黃石有吾師。何事穀城道。披榛尋古祠。風生雕虎嘯。日落蹇驢疲。濟北遙遙去。鷄鳴何處期。

秦溪獨往率爾遣懷

林香迎杖發。一路落橙花。復被鳥聲引。溪南人幾家。喧風吹日動。細水向人斜。卽事可深悔。平生白鼻驢。

感秋

故人書不至。邊雁度梅關。月色江湖上。秋聲枕席間。霜清九曜石。木落二樵山。獨向南樓眺。知予鷗鷺閒。

石埭訪姚六康明府

白筇陂前路。長吟問玉人。琴堂時一望。雨霽九峰新。野寺弛官禁。江樓納客身。還憑仙舄力。能使入山頻。

贈呂半隱常博

巴江隱隱流。豈是瀾江秋。君住湖山曲。峨眉天際頭。雲松巢獨鶴。沙嶼過羣鷗。千里論膠漆。真堪此處投。

長興大雄寺聽吳仲徵彈琴

古寺過從密。秋心不待言。鳴琴篋裏出。歇鳳指端翻。獨作高閣嘯。猶嫌鄰磬喧。當攜畫溪上。彈向老梅根。

客長興時京口李司直自卞山買舟相尋

浮萍各自飄。折簡不煩招。知有五千字。來從丁卯橋。埋名已東郭。訪古尙南朝。想借天人供。禪房慰寂寥。

金陵

六朝君莫問。千古併生愁。宮似咸陽劫。江勝洛水流。鷓鴣何日散。蘆葦颯然秋。獨有秦淮月。時時照客舟。

贈脂落上人住景泰寺

常時住山意。獨與老夫論。眷屬恆相外。雲峯覺爾尊。向人求箬笠。並鳥過松門。度得中餐飽。疏泉注茗根。

上巳蒲澗偕諸子

異地蘭亭會。春郊蒲澗遊。杖隨清瀑引。觴帶白雲流。旅食忽三月。狂歌仍一邱。何煩修禊事。靈境卽蠲憂。

答陸導甫

陸郎金散盡。蕭索對斑駁。踏遍重關草。空餘兩鬢絲。春芳一以歇。陰雨況淒其。世故還相見。披襟似舊時。

相逢行

相逢君不見。疏柳對黃昏。水畔鴉頭襪。墟間犢鼻褌。與雲兼送目。爲草亦交魂。未得通媒妁。微私曷敢言。

閱袁公安卽事起語云箇是春江舊舞樓海棠花下小梁州愛其尖麗效而小變焉曰箇是

箇是春江絕豔船。芙蓉塘外小遊仙。偶看竹淚回雙袖。令譜楓香人四絃。細馬馱來羞虢國。流鶯驚起隔韓嫣。東南亦有秦家女。白日高樓只愛眠。

羸馬垂鞭氣亦豪。關門勝蹟莽相遭。錫來鶉首霸秦繆。會去鴻門興漢高。三輔依然環帝里。二嶠不動表神皋。少年卻在遠林下。閒臂角鷹新放條。

金陵

秦淮新月浸微波。曾咽當年玉樹歌。雙闕荒涼山鳥至。六朝煙靄寺僧多。桃迎渡口春無限。蘋采江南晚奈何。莫把鬚眉倚紅粉。酒樓高絕客顏酡。

自贈

好處都非外物成。自看不解自心情。談詩起舞忘垂老。聽梵悲來感宿生。半口尙沾曾戒酒。終身拌別舊居城。人家積穀塵皆滿。獨埽明窗花裏明。

訪李生池館

枕榔里外薜蘿陰。隔一溪居便自深。書屋總拋蔬地置。詩人多過板橋尋。閒書野事收山葉。偶喚家僮聚水禽。多少名流空眼底。得無迂拙屬知音。

贈蕭孟昉

心過虔江汨汨流。一峯晴處日夷猶。名家彭蠡湖西著。姓氏梁皇寺裏留。園列邨莊皆歇馬。池分沙澗各眠鷗。藏書自祕誰看得。聞說高僧共一樓。

晝畫溪寄慎旃副憲

門當水郭隱湖灣。秋憲家林自愛閒。偶出總經騷客地。端居能鎮道場山。座參奇石聆深語。酒對禪僧發靜顏。頓使嶺南歸思緩。刺船仍約晝溪還。

望圭峯

圭峯歷歷樹燈殘。回首岡州落照寒。欲上峯頭散愁思。匡門東下水漫漫。

明詩紀事卷十二

辛籤

彭孫貽二十八首

孫貽字仲謀海鹽人太僕期生子拔貢生鄉人私謚孝介先生有茗齋集

明詩綜王貽上云仲謀詩宏深奧衍窮變極奇

明人詩鈔正集仲謀太僕期生子太僕守贛州盡節章貢臺故吏杜鳳林桂芳等齎之臺上尋爲部將楊大器與萬安義士曾堯果潛發之攜歸萬安及仲謀至無所得而人言藉藉有謂太僕踰嶺去粵西者是時狐鳴魚帛所在假託禍機不測仲謀乃詭爲得骸招魂以歸陰囑故吏徧蹤跡之卒不得消息仲謀素衣蔬食不交人事二十餘年有時獨立書空或中夜起坐悲歌痛哭人見而怪乃賦遠遊以釋羣疑適仲謀出門而義士曾堯果以太僕遺骸至仲謀聞之奔赴發喪制服擇地以葬卒抑鬱以死仲謀詩諸體皆擅場樂府古詩直造漢魏晉宋人堂奧七言歌行間作初唐體有時學溫李至律體之溫麗絕句之蘊藉與雉弟羹門無多讓焉

田按余閱羹門松桂堂集無一語及其兄仲謀並無一語及其父太僕公天下豈有無父之國哉興亡之際難言之矣仲謀詩沈壯鬱勃爲明季一家其虔臺寒食怨詩云虔南草枯向南樹吹作虔臺塚旁土望帝思君君未歸嘯盡贛江寒食雨紙錢溼煙飛不起五父荒墳石無主幾人江上共招魂瘴海青蠅弔泉戶平原門下客劉生沽得梨花一杯乳獨洒西州淚數行滴

入泉臺草根苦。嶺頭孤兒望臺哭。跪問道旁雙石虎。何處龍蛇綿上灰。浩浩東風鷓鴣舞。當是尋太僕尸不得時而作也。

青溪小姑曲

白石隔青溪。小姑長獨臥。彩虹可作梁。青溪不可度。

玉階怨

獨坐惜羅襪。青苔生未歇。夜深梧影來。仔細尋秋月。

長相思

蜀柳柔碧色。盡是含情枝。吳蠶不上筐。那得長相思。相思道長心斷絕。隴水無聲寄嗚咽。悠悠千里下秦川。秦川盡處洲如月。月明恐不到君傍。君對月明應斷腸。清霜兩地訴容鬢。莫憶故人憶故鄉。

秋歎二首

豺虎晝方暄。白日長閉門。閉門自有人。我胡守故園。近聞溢城下。水戰魚龍昏。大江日夜流。萬里長波翻。跣行踐荆棘。苦月送旅魂。烽火塞路岐。欲去每聲吞。夜月鴻雁飛。流影到几席。高臺埋悲風。歸者乃無翼。三年江楓青。一夢秋月黑。淫雨吹覆巢。其傍多矰弋。毀形謝交遊。廢圃自耘殖。柴車吾將行。歲晚不遑食。

埭溪眺月

塊溪鬱蒼蒼。俯見白石路。夕陰斂皓月。坐久不知暮。鳥歸羣籟息。夜景在高樹。萬物自相依。流水無心住。溪光受山色。寒雲動宿鷺。衆響空漸生。人跡杳非故。悠然立深更。草滴松上露。

陳章侯畫水滸葉子歌

張、吳、顧、陸之寫真。三子聖矣。吳入神。吳後千年有陳子。更開生面尤絕倫。觀其下手萬象變。神鬼觸案窺。纖新離奇衣紋古。面貌愈拙愈秀無前人。雄心怪膽破空出。思令盜跖張麒麟。東京橫行草間客。三十六彪鬚倒磔。宣和佚事譜豺狼。稗官暗舌搖子戟。章侯筆縛牡虎髯。白墨蟠屈行蛇蚺。方頤猛士性火烈。銳頭鶻突花巾尖。提刀顧盼意洶洶。自云義劍無妄殲。卽今寇盜鋒相敵。煙霧中原亂鳧鴨。張曹左革花刺袍。安有斯人不弄刀。梁山狂兒其寫照。鬚眉槎枒山鬼肖。邗人鬪虎杭鬪特。豬奴葉子今英妙。細看繡梓情思深。寫盡張角黃巢心。真龍智勇猛虎服。雲臺畫者曾平林。

棹頭行

黃金臺成凡馬至。驂駟騾耳俱逡巡。凌雲詞客新得意。驕嘶高馬胡由馴。彭郎掉頭仰天笑。翻身歸釣西山鱗。鱸魚正肥蓴菜熟。痛飲三日梨花春。狂來或走諸山上。海水一杯莽相向。觀潮起色僕未能。文園臥病人亡恙。世上文章那足論。窮途意氣輕相讓。丈夫落落非失意。乾坤尚有容汝地。或可披裘大澤中。不然去採湘江芰。齷齪毋爲妻子羞。清狂不畏時人忌。長安第宅高比天。須臾烏雀羅秋煙。黃金橫印何赫

奕指顧牛羊上暮田。以茲感慨更投筆。曳杖歸山抱犢眠。

湖上聞絃索歌

鳥飛日落煙冥冥。湖波不動羣山青。棲鴉嗚破半湖影。欲沒不沒三兩星。昏黃小槽隔溪語。清歌滴瀝沈秋雨。一聲能使天早寒。蕭蕭亂葉飛螢裏。湖舫美人背絃立。夜深始怨哀絃溼。三絃撥捩湖鷓翻。柳梢月重天河急。寒塘悄坐孤蓬客。霜梧仔細尋秋人。露來響絕夢不歸。淒眠夜半成頭白。

武陵旒

武陵山青巖業。武陵之水何紆紆。丹泥而朱提。黃金錯盤螭。帝詔武陵。麻衣墨纓出草廬。麻衣總帶名馬。黃駁雷司馬門。開崖巍職方象胥。鯁背駢趾堵牆立。覩尙書來。帝坐司馬門。賜隄塵中。監給仄理。從容坐對臨平臺。平臺十二墀。金吾開鹵仗。貂衣兩瑞捧白麻。傳制尙書拜丞相。赤金紫蟠虬。尺一朱押填。衛士傳魚鑰。監宮夜呼啓門鍵。丞相暮出文華殿。車何磴磴。馬何屯屯。虎賁御車。丞相夜坐司馬門。綠衣裂麻。廷諍辭嶙峋。帝爲丞相逐小臣。咄咄丞相威莫倫。機槍夜離離。軫翼紛相虧蔽。彤弧黃鉞。金根熊旂。栢梁高宴帝賦詩。帝送丞相出視師。丞相開幕府。握中權。諸侯俱膝行。再拜不敢前。徒易大吏。斬僂令率。司爵司寇不得專。芻如山。騎如驚。甲如林。鋌如屋。朝焚襄陽。暮屠洛陽。丞相有矢。不得發一鏃。雉經未罹羅。狐死不首邱。悲哉丞相。丞相下從二王遊。丞相來。車斑斑。駟彭彭。丞相之去飛素旌。素旌如鳥。武陵溪流淫。

浩浩丞相班師止歸旆。

蕭山望海樓

危樓延野勢。荒樹蠹孤村。一壑奔雷雨。羣山赴海門。帽簷雲氣逼。天角大江渾。指顧分吳越。長流屈水痕。與仲木夜話湖上。

不速逢良友。方舟話夜分。憂時深對酒。散髮細論文。酷暑逃人境。清言落水雲。桔槔聲正渴。未忍醉殘醺。

避地村居二首

避兵離井邑。抱耒入深村。烏雀柴門喜。風塵寇盜尊。輕陰秀禾耳。積水壞籬根。向夕占晴霽。前山白鳥翻。把酒時一醉。好山當我門。三川正龍鬪。八口寄漁船。日腳收殘雨。林光散遠天。千山斷歸雁。四望轉茫然。

遣懷

南陲聞轉戰。嶺上昔經過。華路連熊繹。枕榔隱尉佗。春歸巴鳥怨。雪盡越蠶多。何日還初服。雲山臥薜蘿。夜至泰和縣。

昏黑投山郭。天寒水急流。歸雲接嶺樹。江鶴下城樓。月轉星河直。村空戍火秋。風塵多寇盜。行止莫淹留。

愍亂詩三首

遠戍淮陰送荷戈。中原烽火沒銅駝。玉環幸自藏高廟。桂蠹還愁帝尉佗。三月杏花吹野燒。千村鬼哭怨

鏡歌江東可有人龍臥。痛飲棠梨萬叵羅。
臥澤今無舊隱淪。近來開閣擬平津。盈廷相顧成投鼠。環衛何人可畫麟。聞道羣儒延白虎。何時清論滅黃巾。荒濠小邑多豺狗。不敢高眠理釣緝。
高歌夜舞少年場。梁燕歡娛在畫堂。廚下郎官多狗尾。監門俠客少魚腸。無雙未必來徵辟。百一真堪代補亡。溷跡酒徒甘犢鼻。牛衣竟日曝東牆。

歸思

閒階露白草離離。空館蕭條有所思。紅燭夜殘歸夢後。黃花人瘦倚樓時。山城亂杵催寒早。官閣疏鐘到枕遲。孤客獨眠聽不得。梧桐葉上自題詩。

避地賁湖和緯度

窮巷幽棲罷埽除。前溪殘月上方諸。紅塵避地經年睡。白眼看雲萬事疏。篋草屢刪詩律細。園花幾放酒尊虛。還應鄰叟時相就。楊柳深村坐網魚。

舟阻邗關

淮海盤紆道路長。羈人心事正茫茫。江聲白日收殘暑。夜月青天在野航。孤客不堪聞謝豹。嚴關何意用弘羊。嵎山此去猶千里。河水東流濟半黃。

蝶川晤黃交侯共談家難感憤書懷

干戈滿地接山城。所在流亡苦甲兵。遊子那堪天北望。孤舟應共雁南征。俱傳纓布收彭越。相對黃公哭阮生。惆悵莫須論往事。嶺猿已過第三聲。

天壇晚眺

周垣環輦道。雲物鎖園邱。大典刑牲帛。祠官職冕旒。銀潢扶砌落。珠宿抱壇流。二祖功殊絕。羣倫博考諏。乾坤含一氣。岳瀆視諸侯。神鼎高陵闕。齋宮御蹕留。綠苔蟠古籩。香草入空卣。夾路松陰直。虛筵鳥跡遊。兩京分邾鄆。百戰定嬴劉。五馬今南渡。三山控上游。長江龍虎闕。李廟石羊秋。野蜚飛花緩。春蕪燕子愁。何時上封禪。一爲奠神州。

海上竹枝詞四首

烏夜村西烏夜號。馬嘒城外馬頻嘶。三更歡去月上樹。照見踏霜郎馬蹏。
葫蘆山月長珠胎。海市未開漁市開。殘星滿天細犬吠。黃魚船上販鮮回。
妾家正住南市南。鮑郎場外柳毵毵。柳梢繫船雞喔喔。知有新安人賣鹽。
江東歸信約今朝。空說秦皇石作橋。三十六鱗書未到。曹娥江上不通潮。

馮班五十五首

班字定遠常熟人有定遠小集二卷、鈍吟集三卷、別集一卷、鈍吟餘集一卷、集外詩一卷、遊仙詩一卷、樂府一卷、文藁一卷。

初學集定遠吾友嗣宗之子也。游於吾門。其爲人悠悠忽忽。不事家人生產。衣不揜骭。飯不充腹。銳志講誦。亡失衣冠。顛墜坑岸。似朱公叔。燎麻誦讀。昏睡燕髮。似劉孝標。闇略眇小。蕩佚人間。似其家敬通。里中以爲狂生。爲專愚。聞之愈益自喜。其爲詩沈酣六代。出入於義山。牧之。庭筠之間。其情深。其調苦。樂而哀。怨而思。情所謂窮而能工者也。

陸贄典元要齋集定遠詩敦厚溫柔。瓌麗深穩。樂不淫。哀不傷。美刺有體。比興不墜。古之稱杜者。謂之無字無來歷。此定遠之長也。

池北偶談。馮定遠博雅善持論。著鈍吟雜錄六卷。論文多前人未發。

趙執信飴山堂集定遠先生詩原本詩騷。務裨風教。至於條纒體製。含咀雅頌。北宋以來未之有也。

靜志居詩話。啓禎詩人善言風懷者。莫若金沙王次回。定遠稍後出。分纏並驅。次回以律勝。定遠以絕句見長。次回全學溫李。定遠多師。其源出於才調集也。

王應奎柳南隨筆。趙秋谷於近代文章多所訾。獨折服馮定遠。一見鈍吟雜錄。卽歎爲至論。至具朝服下拜。嘗謁定遠。以私淑門人刺焚於冢前。

田按定遠博學多聞。鈍吟雜錄十卷。推爲獨絕。詩於齊梁及唐人溫李無所不仿。藻麗中別有古韻。固由才筆殊絕。亦是學古功深。觀其論古今樂府。獨見分曉。今具錄於此。古詩皆樂也。文士爲之辭曰詩。樂工協之於鐘呂爲樂。自後世文士或不闡樂律。言志之文。乃有不可施於樂者。故詩與樂畫境。文士所造樂府。如陳思王。陸士衡。於時謂之乖調。劉彥和以爲無詔伶人。故事謝絲管。則是文人樂府。亦有不諧鐘呂。直自爲詩者矣。樂府題目。有可以賦詠者。文士爲之詞。如繞歌諸篇是矣。樂府之詞。

有調豈可愛。文士擬之。如東飛伯勞。相逢行。青青河畔草之類。皆樂府之別支也。七言創於漢代。魏文帝有燕歌行。古詩有東飛伯勞。至梁末而七言盛。於時詩賦多有七言。或有雜五七言者。唐人歌行之祖也。聲成文謂之曰歌。曰行者。字不可解。見於宋書樂志所載魏晉樂府。蓋始於漢人也。至唐有七言長歌。不用樂題。直自作七言。亦謂之歌行。故文苑英華歌行與樂府又分兩類。今人歌行題曰古風。不知始於何時。唐人殊不然。故宋人有七言無古詩之論。予按齊梁已前。七言古詩有東飛伯勞。盧家少婦二篇。不知其人代。故題曰古詩也。或以爲梁武蓋誤也。如唐初盧賡諸篇有聲病者。自是齊梁體。若李杜歌行。不用聲病者。自是古調。如沈佺期盧家少婦。今人以爲律詩。唐樂府亦用律詩。唐人李義山有轉韻律詩。白樂天杜牧之集中所載律詩。多與今人不同。瀛奎律髓有仄韻律詩。嚴滄浪云。有古律詩。則古律之分。今人亦不能全別矣。才調集卷前題云。古律雜歌詩一百首。古者五言古也。律者五七言律也。雜者雜體也。歌者歌行也。此是五代時書。故所題如此。最得之。今亦鮮知者矣。大略歌行出於樂府。曰行者。猶仍樂府之名也。杜子美作新題樂府。此是樂府之變。蓋漢人歌謠。後樂工采以入樂府。其詞多歌當時事。如上留田。霍家奴。羅敷行之類是也。子美自詠唐時事。以俟采詩者。異於古人。而深得古人之理。元白以後。此體紛紛而作。總而言之。製詩以協於樂。一也。采詩入樂。二也。古有此曲。倚其聲爲詩。三也。自製新曲。四也。擬古。五也。詠古題。六也。并杜陵之新樂府。七也。古樂府無出此七者矣。唐末有長短句。宋有詞。金有北曲。元有南曲。今則有北人之小曲。南人之吳歌。皆樂府之餘也。

陽春曲

銀鉤綵絡雙鸞鬪。錦痕花盛穠紅皺。杏梁燕語莫愁眠。絲絲日影熏殘晝。玉臺霍霍挂菱花。漆背金龍雙攞擊。水翦清眸新月曙。十指如葱扶曉鴉。城南陌上桑芽綠。雲影煙絲交促速。長簷金櫨不相迎。暗上牆

頭窺宋玉。

江南曲

春風一夜吹江色。千里細煙生亂碧。草芽纖細徧金陵。古石苔荒江令宅。年年歲歲常如此。千燒萬戰臺城圯。鳴尾塵埋三閣平。張孔銷亡二周死。石頭城下水悠悠。暗數興亡得幾籌。山川不改繁華在。兩槩依然迎莫愁。

樓中憶春詞

曉風撼羅窗。凝霜封碧瓦。樓中淡日紅。亭亭瑋碎玉。鳴檐馬。花匿金隱古。漆光口脂凍。滑珊瑚。香低鬢。壓領朝粧嬾。試倚朱闌欲斷腸。愁雲塞路關河杳。冰痕合處無青草。青皇消息隔嚴寒。小院苔荒人自老。

十二月樂辭

正月

煙籠疊錦鴛鴦嬾。半夜春回知夜短。輦風吹露洗枯條。東南半樹煙初煖。蘭室金堂有新故。開歲偏愁歲華度。誰將錦帖寫銀鈎。繡帽兩兩題花句。

二月

桃蹊李蹊風綽綽。額粧粉膩梅花落。衛郎羸病怯春寒。珍珠如露琉璃薄。垂楊逗綠煙如埽。銀鞍細犢城

南道飛香拂路晚歸時。明珮金丸滿芳草。

三月

義和浴日時。天紅落花露。深淺滿香谿。復著春煙護。美人握鏡紗窗裏。峩峩洛髻濃雲起。陌頭攜果待潘郎。碌碌金車咽流水。

四月

芳實墮金丸。喬柯壓頰綠。鳳花耿介南陌頭。銅牙柘彈閒相逐。細雨空濛裊溼紅。錦塘波煖鴛鴦浴。翠臺遠山雲簇簇。龍鱗冷滑鋪寒玉。

五月

湘竹波勻血暈光。生綃紅影籠虛涼。頰鬢壓枕玉無力。槿花露笑聞鷓黃。纈眼玲瓏透濃日。鏡檻無塵花密密。水精壺薄柘漿寒。纖手金盤沃丹實。

六月

輕縠靜無波。玉宇少涼意。當空午暈紅徘徊。吐火燒塵撲天地。阿侯衫薄腰如束。塘上芙蓉花簇簇。紅粧待晚未歸來。艇子雙橈繫江木。

七月

河影西迴玉鉤淺。露泣鮫珠星閃閃。金井沈沈素綆長。玉几水咽銀屏掩。漢帝離宮樓百尺。鵲駕迢迢雲
弈弈。蛛網懸空得巧時。綠窗風蕩蜻蜓翼。

八月

雲凝薄絮天如水。桂魄團團夜千里。蘭葉參差閃露光。芙蓉粉露愁香死。軋軋鳴機蟲嘖嘖。小窗燈暗拋
蠟鼻。楚客孤眠愁夜長。流光遶簾疏螢溼。

九月

淒淒水國寒來早。千里青青一朝老。山陰古道馬蹏輕。刀截山光天杳杳。高樓粧罷金鴉沒。禽花無豔空
雲髮。倚闌不寐戀殘秋。霜波著瓦琉璃滑。

十月

朝眠戀錦衾。夜飲愁花漏。日影鎖窗高。玉病蘭芽瘦。香熱毳毼紅。鳳尾金花透。落葉淨梧宮。西施雙綠皺。

十一月

雕薪爨五鼎。豹胎椒桂香。錦障圍花玉。蠟椽薰華堂。綠熊紫雉交輝光。博山雲起夜未央。門前白馬嚙嚴
霜。

十二月

九河濁浪堆頑玉。馬影車聲交獨鹿。愁雲漠漠日無光。旅被蒙茸貂不足。臨邛美人山黛結。梁園賦客朱絃絕。素翎丹頂是何人。泠泠對語堯年雪。

雜詩三首

人生抱志節。所遇蓋偶然。往往中下材。逢時幸瓦全。盛譽冠中區。膏明惟自煎。支天計不就。今爲人所憐。苟生旣不易。罔死亦何稱。生死諒微渺。神理儻有憑。寢薪以待燃。履霜未知冰。多謝俗中子。迷謬何相仍。讀書目力盡。彎弓臂不開。栖栖五十載。餘生真可哀。山川百戰處。昔人已蒿萊。於今一具骨。不知何處埋。

題小刀

一尺清光勢似鉤。鏗邊名姓舊來讐。未甘孤怯常磨看。自恨粗疏更密收。無質暮煙輕欲動。有情秋水凍難流。飲飛匕首堪爲伴。但斬蛟龍不覓侯。

偶然

偶然興到愛神仙。燒盡丹砂未有緣。雲粉可能粧弄玉。飛駟從自降羊權。奔星舊婢羞靈洞。繞日神駒秣野田。但得餘杭有奇酒。恆須一醉一千年。

偶書

少年孤露長年慵。詣死無成愧老農。墮地拖腸常作鼠。升雲燒尾未爲龍。弓彎也識天心曲。弦直方知世

不容百事須愁愁不得。壚邊常羨潑醅濃。

感舊

當日樓中夜未闌。隔簾紅藥露團團。清歌出格鯨尊滿。醉袂霑香鳳蠟殘。暗與美人收墮珥。狂教座客笑遺冠。重來事事陵成谷。一片秋陰作晚寒。

次韻四時回文宮詞四首

雛鶯小轉乍驚眠。內苑花開未禁煙。爐鴨凝寒春夢淺。鏡鸞呵冷曉粧妍。鋪塔玉鈿梅飄粉。覆殿金條柳。驪綿。珠露滴殘鐘漏斷。烏嗁曉樹碧窗前。

雷輕響處走和鸞。隔院歌聲語笑歡。臺樹碧雲侵殿帳。渚蓮紅露滴珠丸。頰鬢綠枕冰綃薄。膩粉香肌玉。簫寒。開扇翠花金尾鳳。垂簾繡額錦龍盤。

秋聲一雁唳清霜。點點苔錢碧砌涼。愁掩舊屏銀燭暗。恨題新字粉箋香。鉤鉤月墮梧宮夜。翦翦風寒水。殿湯。流淚暗銷魂夢斷。樓空倚遍數更長。

風輕觸處動簾釘。老榦冰花浸水瓶。紅燄獸爐金冉冉。急絃蠻柱玉泠泠。空屏畫蠟煙飄施。暗牖瓊鉤月。挂榭。龍繡凝香椒壁煖。重門禁院靜垂鈴。

古臺城

六朝形勝畫中開。重疊河山勢盡迴。誰躍青驄三閣下。曾聞白馬壽陽來。東游漫費秦王力。北去空教庾信哀。此日蘭皋徒極目。百年江表只蒿萊。

感事

風景當前漫撫膺。東南忍見杞天傾。龍盤王氣山空在。馬渡江潮水未平。誰致倒戈攻鐵甕。更聞降孽掠蕪城。謝安王導惟邱墓。天塹徒縈十萬兵。

梅花

素質先春迴出羣。相思何處夢紛紛。莫言蕩婦樓中粉。只是仙人嶺上雲。半樹臨風驚曉色。一枝如雪立斜曛。偏憐最有池中水。纔得冰開已照君。

早春偶題

膩粉妖香一番新。庭前蹊畔見精神。後先開落原由種。紅白紛張盡屬春。醉靈東家驚豔笑。倚風西子帶微顰。王孫莫惜頻頻賞。須怕吹來散作鱗。

酬友人韻

不得梯媒進步難。每逢知己但長歎。窮如海鳥愁過魯。冷似蝦蟆怕屬官。破甑轉頭成蝶夢。直鉤多事守魚灘。半生筆硯漸朱紫。渾是朝饑待一餐。

落花

秋菊春松各一時。不須惆悵怨殘枝。仙桃有實應難種。穠李無言莫費詞。判斷繁華誰是主。分張紅白豈容私。晚來斜日宵來雨。試問深閨幾箇知。

重經沈氏園

昔年無賴此猖狂。一飲從教一石強。鬧曉醒時鶯燕亂。趁春終日蝶蜂忙。浮雲帶樹添山影。嫩葉封條鬪日光。此事可堪惆悵極。抱山堂後舊長廊。

樂府體二首

桐生蜀坂上。絲生吳笳中。兩物不相纏。曲意無由通。起坐不自得。無端愁相縈。寒飈吹敗葉。判是作風聲。

讀漢書

天醉初醒赤帝昌。從來顧命係興亡。蕭公自築麒麟閣。卻與他時畫霍光。

春分日有寄

池塘狼藉草紛紛。日帶嫣紅露有文。刻意傷春春又半。可知愁煞杜司勳。

草

濃黛勻鋪絲不休。最宜長路水悠悠。昭君塚上千年色。每逐春風徧九州。
畫屏風

時勢妝梳色色新。吳娃偏自小腰身。修蛾雲鬢能多少。枉向陽林賦洛神。
有贈

隔岸吹唇日沸天。羽書惟道欲投鞭。八公山色還蒼翠。虛對圍碁憶謝玄。
越鳥

無聊自撚鬢邊絲。日照殘春午景遲。每對茅檐慚越鳥。爲伊情性戀南枝。
有感

禾黍離離天闕高。空城寂寞見回潮。當時最憶姚斯道。曾對江山詠六朝。
柳枝詞

汴水東來欲下遲。千條依舊裊金絲。蕭娘流落宣華死。當日春風爲阿誰。
倣元微之春詞

一隻黃鸝萬樹花。粉牆回處是東家。馬蹏爭踏門前路。偏認蕭郎白鼻騮。
戲題

世間無賴是豪家。處處朱門鎖好花。惟有夢魂難管束。任他隨意到天涯。

行雲

滿袖嘯痕雜酒痕。百回消息暗銷魂。無端一片行雲起。知是瑤姬不敢言。

送陳確菴遊楚

三戶存亡漫愴情。此中神理自難明。方城漢水今何似。爲我投書問屈平。

江南雜感

席捲中原氣太饒。小朝終見作降俘。不爲宰相眞閒事。留得丹青夜宴圖。

火籠

坐對長明一盞紅。四更禰榻落花風。自憐喚老無燕玉。空倚盧姬舊火籠。

錦峯春遊

白雲多處水潺潺。亂石縱橫翡翠斑。最憶當時黃子久。愛將縑素寫虞山。

感舊

擬託浮波又自休。水窗鸞鏡見梳頭。玉郎偏得瑤華贈。兩槳風輕只載愁。

遊仙詩三首

愁來憤欲箋天更保紅顏得幾年。自爲才高真氣薄。不如依分作頑仙。
金母東家寧小郎。摩挲寶劍倚天長。笑他后羿調弓矢。不射妖星射太陽。
珠自開花玉自苗。瑤窗雲影接丹霄。霞襦乞得天孫錦。自理金梭織鳳毛。

臨桂伯墓下

馬鬣悠悠宿草新。賢人聞道作明神。昭君恨氣長弘血。帶露和煙又一春。

紀映鍾二十四首

映鍾字伯紫一字伯子號鸞叟自稱鍾山遺老上元人移居儀真有真冷堂詩稿。

池北偶談伯紫負詩名嘗有句云惆悵天涯頭易白楊花空滿閣江樓佳句也。

詩觀二集伯紫詩氣極雄渾識極超卓運置天然自合尺度。

本事詩鸞叟與方文林古度齊名白髮當歌紅牙聽曲說青溪舊事娓娓不倦一日與大梁周在浚茗溪徐倬暨僕輩痛飲燕市城西有絕句云風雅松陵勝昔時力裁僞體出偏師徐郎本事從珍重始信無情未是詩謂余所輯續本事詩也。

鄭方坤詩人小傳崇禎時張天如張受先楊維斗周介生輩舉復社四方雲集響應各以類從金陵爲陪京重地山川妍淑風物清華鐘鼓聲聞衣冠都雅是時扶質垂暎星奔川鶩者則必以紀伯紫顧與治二君爲職志繼丁陽九之阨伯紫以膏雲白雪之身嶮然不滓少與廬江龔宗伯友善宗伯既貴招至京華下榻歲且十稔此外未嘗輕謁一人輕投一刺如天半朱霞可望而不可卽詩若干卷宗伯爲繡梓以傳。

田按伯紫五古兀傲七言長篇尤痛快淋漓律體老蒼大都得力於杜老爲多。

學圃歌贈鄧孝威

我爲東湖樵。子學南山圃。相逢大道傍。雪涕問勞苦。我逢冬青樹。再拜不敢斧。子有東陵瓜。屢潰深秋雨。生事尙饑寒。吟詩作蒿堵。

渡黃河

黃河接東海。道路遠且長。白楊風蕭蕭。吹彼落日荒。孤城蘆荻中。四顧徒皇皇。病馬嘶寒煙。老鳥立平岡。中歲倦于役。筋力匪故常。舍鞍復望楫。意緒如亡羊。睠矚無匹儔。觸懷多盡傷。魚鹽藏聖士。販繒亦侯王。英雄皆瓦注。感此悲浪浪。

悲吟

賣畚洛陽市。不逢蒿山客。蒼蒼山下雲。日暮松楸碧。我憐王景略。甘爲苻堅畫。英雄悲不遇。既遇良可惜。觀白石翁三丈畫卷歌

石田畫卷長三丈。邱壑幽深氣塊莽。大山未斷小山出。大溪湔泓小溪急。山迎溪互密濛濛。大松小松查枒橫。側交其中。看過丈餘始閒曠。孤亭似有人來往。從此山川又奇奧。渾雄一變成蒼峭。千流萬壑排空來。龍湫鳥道偈天開。流觀兩目不暇瞬。當年落筆何奇哉。人觀此翁畫手妙在疾。不知翁也未畫凝思坐一室。忽然盤礴神明開。天地低昂萬形失。吁嗟乎未登太華東南峯。未攬河海陟登封。畫山卽山水卽水。

何時更得開心胸。石田翁落筆茫茫人不測。不知翁也何所得。畫成水石不異人。卻教舉世無人識。

七月六日方爾止齋山草堂對酒歌

天上雙星未渡河。秦淮流水秋生波。齋山草堂最疏豁。短牆風到吹煙蘿。我從江南徙江北。相思不見中情多。今來喜得話疇昔。比鄰客亦聞相過。謂鄭梅龜竹聲琅琅響寒玉。雲陰漠漠垂庭柯。六街禱雨禁屠割。君家生菜盈坡陀。小烹佐酒雜乾腊。懷抱傾吐捐沈疴。人生動卽千里隔。江山況復連兵戈。相逢縱飲意良足。清涼不異棲巖阿。牀頭鷓鴣已交臥。睥睨顏色何人配。芙蓉花開塘水淺。醉來起舞同高歌。城頭飛雨時一至。安得大地呼滂沱。

姚寒玉畫古梅屏障歌

姚氏畫梅世稱絕。古梅更有寒玉奇。輕綃尺幅且高閣。潑墨十丈光離離。楚江匹紙鵝溪絹。五間大屋橫鋪徧。崑崙朔客當前立。大呼落筆如飛電。千柯萬蒂花茸茸。聚頭交臂重復重。龍驚鶴攫勢莫喻。斷斂屋漏難爲容。立者一株掣空墮。懸石崩虹自礪礪。臥者一株強項起。病螭矯首肢猶惰。初看滿壁暈雲霞。拂拭珠斗移星槎。百回俯仰發狂叫。化工在手誰能挈。姚子精悍身短小。少年汗血推驥馭。弩折千鈞四海空。胸藏五岳孤雲渺。偶從筆端出靈怪。聖者難名愚者拜。腕中神物通冥濛。指下丹砂更狡獪。是日斜陽照積雪。疏林燦燦寒葩綴。羅浮孤山恍對面。堂上林間鬪工拙。我有心頭萬斛愁。萬斛之酒澆不休。見此

妙跡頓空澈。松風颯耳。清泉流。嗚呼胡琴何必碎。峴碑何必留。直從梅花證仙佛。衆香國裏春悠悠。

送鍾子黃歸鹿宕

送君歸鹿宕。山色正蕭蕭。雨氣江湖白。秋聲日夜驕。殘書披礪戶。幽鳥待松寮。他夕天門月。鍾期信可招。

過黑石嶺宿壽陽縣

黑石嶺當關。停鞭意獨難。此行堪白骨。盡日厭看山。寨出荒雲外。田耕絕壑間。到來松下驛。好月照愁顏。

兵至閩中
舊作

糜爛方完額。軍書趣借徵。呼嘯通比屋。髡薙淨邱陵。愛養天心嗇。追呼吏牘能。深山猶伏莽。多壘不堪增。

三山秋興次李空同河上韻

閩王營土宇。封域阻重關。行省前朝殿。層樓鎮海山。池隍藏厭勝。輿廢亦循環。眺覽情無極。斜陽下浦灣。

東郡中秋雨中書懷

去歲此宵雨。螺江動旅愁。夜深明月出。呼客共登樓。魯酒今年醉。商聲滿樹秋。疏燈人反側。浙瀝到床頭。

曹縣送陳宗來

同作兼葭客。蕭然河上秋。送君歸故里。大火正西流。匹馬循秦嶧。離人集楚邱。依依城畔柳。欲去更淹留。

雁門關

太原城北路，直與雁門連。秦月秋鳴鏑，并人夜控弦。地圖經百戰，山勢鎖三邊。西望銷兵久，淒其弔阪泉。
寄紫淀翁

岸草濛濛碧，客心愁未終。春歸荒牖水，麥秀打船風。野廟悲無主，人煙日不同。故園櫻筍節，知爾念飄蓬。
送郭皋旭之大梁

吹簫燕山風月清，朱家樽酒惜離情。火流七夕秋初到，客去三河雁有聲。逆旅埽除迎郭泰，監門慷慨問侯生。此行應有梁園賦，沙草萋萋繞故城。

送吳長文出塞

憶昔相逢濩澤頭，大行東阻白雲秋。孤城上黨砧初動，奇士南皮轍尙留。廿載再看顏色好，餘生強半別離愁。輸君結束情偏健，又著黃衫跨紫驄。

廣陵夏夜同與治半千蒼略訪楚吟城北村舍次與治韻

顧子乘舟江霧昏，杜鰲促膝坐前村。白雲滿地鄰僧磬，黃葉封溪處士門。傍舍只須山一片，閉關常得酒盈樽。最憐合併如斯少，夜半傾泉煮北源。

稼公寓齋小集綺李攜被宿陳其年吳子班繼至

日日秋陰雨細飛，夕葵開落傍柴扉。幽人襆被移書榻，古寺鐘魚度翠微。飄泊酒杯逢李燮，疏狂詩句見

元暉板橋新水添三尺。衰柳依依送客歸。

張幼仁園居

結構幽居似輞川。鷺峯鹿苑一溪連。天涯白首歸張翰。海內丹山老鄭虔。高閣三層懸暮雪。荒畦十畝刈寒煙。城陰宅近堪來往。古路鐘聲不計年。

秦淮夏日詞二首

剩水殘山樂事多。少年能唱後庭歌。搗箏撥阮嘈嘈起。月落城烏奈樂何。片雨過城細草薰。江山如畫鳥空聞。誰家樓上穿鍼坐。一片秋雲似舞裙。

答元白惠兔腊

梅花如雪下荒廚。賀監高懷念老夫。何日短衣隨李廣。空山一矢斃於菟。

同戈驛

唐太宗起兵處

李花開出晉陽宮。義士同戈氣決東。衰草祇今無馬跡。滿山落葉戰西風。

南風

日日南風吹面皮。黃沙如雪裹鬢眉。等閒下馬看流水。拾得昆陽舊箭鏃。

明詩紀事卷十三

辛籤

顧炎武十九首

炎武初名絳字甯人崑山人福王時授兵部司務唐王立除兵部主事光緒三十四年從祀孔廟有亭林詩集五卷

李光地榕村集甯人博涉強識好爲蒐討辯論之學十三經諸史旁及子集稗野列代名人著述徵文碎義無不攷究駢驅走天下所至荒山頽阻有碑版遺跡必披榛菅拭斑蘚讀之手錄其要以歸于六書音韻尤有獨得有顧氏之書然後三代之文可讀雅頌之音各得其所自漢晉以來未之有也

潘耒遂初堂集甯人先生負絕世之資潛心古學九經諸史略能背誦尤留心當世之故實錄奏報手自鈔節經世要務一一講求當明末年奮欲有所自樹而迄不得試窮約以老然憂天閔人之志未嘗少衰事關國計民命者必窮源溯本討論其所以然足跡半天下所至交其賢豪長者攷其山川風俗疾苦利病如指諸掌精力絕人無他嗜好自少至老未嘗一日廢書出必載書數籠自隨旅店少休披尋搜討有一疑義反復參攷必歸于至當有一獨見援古證今必暢其說而後止當代文人學士語學問必斂衽推顧先生凡制度典禮有不能明者必質諸先生鑿文軼事有不能知者必徵諸先生先生手畫口講探源竟委人人各得其意以去天下無賢不肖皆知先生爲通儒也

鮪琦亭集。亭林先生晚益篤志六經。謂古今安得別有所謂理學。經學卽理學也。自有舍經學以言理學者。而後邪說以起。不知舍經學則其所謂理學者禪學也。故其本朱子之說。參之以慈谿黃東發日鈔。所以歸咎於上蔡。橫浦。象山者甚峻。於同時諸公。雖以苦節推百泉。二曲。以經世之學推梨洲。而論學則皆不合。

靜志居詩話。甯人詩無長語。事必精當。詞必古雅。抒山長老所云清景當中。天地秋色。庶幾似之。

明詩別裁。甯人肆力於學。窮極根柢。韻語其餘事。然詞必已出。風霜之氣。松柏之質。就詩品論。亦不肯作第二流人。明三十家詩選。亭林詩。懸弔滄桑。語多激楚。茹芝採蕨之志。黍離麥秀之悲。淵深樸茂。直合靖節。浣花爲一手。豈宋谷音。月泉諸人所能伯仲哉。

田按。亭林五謁孝陵。四謁攬宮。辭大科。卻特薦之。死靡他。遜世無悔。爲明末之完人。啓聖朝之碩學。其詩包孕羣材。扶持風教。點竄經籍字句。尤見雅裁。

贈萬舉人壽祺

白龍化爲魚。一入豫且網。愕眙不敢殺。縱之遂長往。萬子當代才。深情特高爽。時危見繁維。忠義性無枉。翻然一辭去。割髮變容像。卜築清江西。賦詩有遐想。楚州南北中。日夜馳輪鞅。何人調北方。處士才無兩。回首見彭城。古是霸王壤。更有雲氣無。山川但塊莽。一來登金陵。九州大如掌。還車息淮東。浩歌閉書幌。尙念吳市卒。空中弔魍魎。南中不可託。吾亦久飄蕩。崎嶇千里間。曠然得心賞。會待淮水平。清秋發吳榜。

贈鄖處士繼恩

市中問韓康。藥肆在何許。床頭本草書。門外長桑侶。每吟詩一篇。冷然在雲天。筇穿北固雪。艇迷京口煙。

登岱

六代江山好。愁來恣撻討。蘭蓀本獨芳。薑桂從今老。去去復棲棲。河東王伯齊。年年尋杜甫。一過浣花溪。
尼父道不行。喟然念泰山。空垂六經文。不覩西周年。七十二君代。乃有封禪壇。書傳多荒忽。誰能信其然。
既嘗小天下。復觀邃古前。羲黃與堯舜。蕩滅同雲煙。社首卑附地。徂徠高摩天。下視大海旁。神州自相連。
天地有變虧。何人得昇仙。遺弓名烏號。橋山葬衣冠。末世久澆訛。孰探幽明原。三萬六千年。山崩黃河乾。
立石旣已剋。封松旣已殘。太陽不東昇。長夜何漫漫。哀哉一顏淵。獨立瞻吳門。疲精不肯休。計畫無崖垠。
復有孟子輿。眷眷明堂言。庶幾大道還。民質如初元。上采黃金成。下塞宣房湍。何時一見之。太息徒潺湲。

謁夷齊廟

言登孤竹山。愾焉思古聖。荒祠寄山椒。過者生恭敬。百里亦足君。未肯滑吾性。遜國全天倫。遠行避虐政。
甘餓首陽岑。不忍臣二姓。可爲百世師。風操一何勁。悲哉尼父窮。每歷邦君聘。楚狂歌鳳衰。荷蕢譏擊磬。
自非爲斯人。棲棲無乃佞。我亦客諸侯。猶須善辭命。終懷耿介心。不踐脂韋徑。庶幾保平生。可以垂神聽。

長安

東井應天文。西京自炎漢。都城北斗崇。渭水銀河貫。千門舊宮掖。九市新塵閤。雲生百子池。風起飛廉觀。
呼韓拜殿前。頡利俘橋畔。武將把雕戈。文人弄柔翰。遺跡俱煙蕪。名流亦星散。愁聞赤眉入。再聽漁陽亂。

論都念杜篤。去國悲王粲。積雨乍開霽。淒其秋已半。惆悵遠行人。單衣裁至罽。

重過代州贈李處士因篤在陳君上年署中

雁門春草碧。且復過滹沱。爲念離羣友。三年愁緒多。魯酒千鍾意不快。龜山蔽目齊都隘。卻來趙國訪廉頗。還到關中尋郭解。陳君心事望諸儔。吾友高才冠雍州。玉軸香浮鈴閣曉。彩毫光照射堂秋。人來楚客三閭後。賦似梁園枚馬遊。句注山邊餘舊壘。五原關下臨河水。青冢哀笳出漢宮。白登奇計還天子。窮愁那得一篇書。幸有心期託後車。又逐天風歸大海。好憑春水寄雙魚。

千里

千里吳封大。三川震澤通。戈矛連海外。文檄動江東。王子新開邸。將軍舊總戎。登壇多慷慨。誰復似臧洪。
應州

灑南宮闕盡。一塔挂青天。法象三千界。華戎五百年。空旛搖夜月。孤磬落秋煙。頓覺諸緣盡。臨風獨灑然。
閏五月十日

京口

重逢閏五日。壇漫客山東。郡國戈鋌裏。園陵灌莽中。草穿新壘綠。花隔舊京紅。更憶王符老。飄淪恨不同。
東吳北翟戰爭還。天府神州白二關。末代棄江因靖鹵。靖鹵伯當年開土是中山。雲浮鶴鶴春空遠。水擁

蛟龍夜月閒。相對新亭無限淚。幾時重得破愁顏。

金壇縣南五里顧龍山上有高皇帝御題詞一闕

突兀孤亭上碧空。高皇於此下江東。卽今御筆留題處。想見神州一望中。黃屋非心天下計。青山如舊帝王宮。丹陽父老多遺恨。尙與兒童誦大風。

淮北大雨

秋水橫流下者巢。踰淮百里卽荒郊。已知舉世皆行潦。且復因人賦苦匏。極浦雲垂翔溼雁。深山雷動起潛蛟。人生只是居家慣。江海曾如水一坳。

濟南

落日天邊見二峯。平臨湖上出芙蓉。西來水竇緣王屋。南去山根接岱宗。積氣蒼茫含斗宿。餘波澆潏吐魚龍。還思北海亭中客。勝會良時不可逢。

田按甯人七律講氣格。濟南詩云。絕代詩題傳子美。近朝文士數于麟。可以知其旨矣。

居庸關

居庸突兀倚青天。一澗泉流鳥道懸。終古戍兵煩下口。本朝陵寢託雄邊。車穿褊峽鳴禽裏。烽點重岡落雁前。燕代經過多感慨。不關遊子思風煙。

與江南諸子別

絕塞飄零苦著書。竭來行李問何如。雲生岱北天多雨。水決淮壩地上魚。濁酒不忘千載上。荒雞猶唱二更初。諸公莫效王尼歎。隨處容身足草廬。

屈山人大均自關中至

弱冠詩名動九州。紉蘭餐菊舊風流。何期絕塞千山外。幸有清樽十日留。獨漉泥深蒼隼沒。五羊天遠白雲秋。誰憐函谷東來後。班馬蕭蕭一敝裘。

過蘇祿國王墓有序

永樂十五年九月。蘇祿國東王來朝。歸次德州。病卒。遣官賜祭。命有司營墳。葬以王禮。上親爲文。樹碑墓道。留其僮從十人守墓。其後子孫依而居焉。余過之。出祝版一通。乃嘉靖年者。宛然如故。其字體今人亦不能及矣。

豐碑遙見炳奎題。尙憶先朝寵日碑。世有國人供灑掃。每勤詞客駐輪蹄。九河冰壯龐狐出。十二城荒白鶴棲。下馬一爲郟子問。中原雲鳥正淒迷。

讀李處士顯襄城紀事有贈有序

處士之父可從。崇禎十五年以壯士隸督師汪公喬年麾下。以五千人剿賊至襄城。死之。處士年

十六貧甚。與其母彭氏并日而食。力學有聞。越二十九年。始得走襄城。爲汪公及其父設祭。招魂以歸。余與處士交。爲之作詩。

躑躅荒郊。醉一樽。白楊青火。近黃昏。終天不返。封嶠骨。異代仍招。復楚魂。滿阪愁雲。隨獨雁。潁橋哀水。助嘯。援五千國士。皆忠鬼。孰似南山孝子門。

恭謁孝陵

閏歷窮元季。眞符啓聖人。九州殊夏裔。萬古肇君臣。武德三王後。文思二帝鄰。卜年乘王氣。定鼎屬休辰。江水縈丹闕。鍾山擁紫宸。衣冠天象遠。法駕月遊新。正寢朝羣后。空城走百神。九嶼超巒嶺。原廟逼嶙峋。寶祚方中缺。炎精且下淪。郊垆來獵火。苑籞動車塵。繫馬神宮樹。樵蘇御道薪。歸然惟殿宇。一望獨荆榛。流落先朝士。閒關絕域車。千戈逾六載。雨露接三春。患難形容改。艱危膽氣眞。天顏杳靄接。地勢鬱紆親。尙想初陵製。仍詢徙邑民。因山皆土石。用器不金銀。紫氣浮天宇。蒼龍捧日輪。願言從鄧禹。修謁待西巡。

王夫之四十二首

夫之字而農。衡陽人。崇禎壬午舉人。桂王時。以薦授行人。光緒三十四年。從祀孔廟。有買薇稿、澣澣園初集、薑齋五十自定稿、六十自定稿、七十自定稿、柳岸吟、落花詩、遣興詩、和梅花百詠、洞庭秋、雁字詩、仿體詩、嶽餘集。

劉獻廷廣陽雜記。王而農先生壬申歲已八十矣。隱居山中。未嘗入城市。其學無所不窺。於六經皆有發明。洞庭以南。天地元氣。聖賢學脈。僅此一綫耳。

沅湘耆舊集。船山先生號糞齋。又號雙髻外史。中歲稱一瓢道人。南渡後。走桂林。依瞿忠宣。薦授行人司行人。崎嶇楚粵。黔閩。備歷艱險。後以母病間道歸。遂不復出。緬甸既覆沒。益自韜晦。嘗匿常甯。猿洞。變姓名爲猿人。已築土室於石船山。名曰觀生居。敗葉廬。又曰湘西草堂。晨夕杜門著書。滄桑黍離之感。生死不忘。其學深博無涯涘。獨不喜陸子靜。王伯安之說。原本淵源。尤在正蒙注一書。往復辨論。所以歸咎於上蔡。象山。姚江者甚峻。其志行之超卓。學問之正大。體用之明備。著述之精卓宏富。富與顧亭林。黃梨洲諸老相頡頏。精研六經。詩其餘事。詞旨深覈。氣韻沈鬱。讀之如夏鼎商彝。如聞哀猿唳鶴。使人穆然神肅。翛然意遠。

曾國藩文正集。先生隱迹湘西之石船山。荒山敝榻。終歲孳孳。求所謂育物之仁。經邦之禮。窮探極論。千變而不離其宗。曠百世不見知而無所於悔。先生歿後。巨儒迭興。或攻良知捷獲之說。或辨易圖之鑿。或詳考名物訓詁音韻。正詩集傳之疏。或修補三禮時宮之儀。號爲卓絕。先生皆已發之於前。與後賢若合符契。雖其著述太繁。醜駁互見。然固可謂博文約禮。命世獨立君子已。

田按。船山先生博通經史。闡明正學。尤爲儒者之宗。究心吟事。自述早年問津北地。信陽。未就而中改從竟陵。晚乃和阮和陶。取境益上。自定爲五十六。七十三稿。余謂先生詩。講學則擬白沙。定山。摹仿則師漢魏。盛唐。下逮於明之作家。無所不擬。其論詩則薄宋元。猶是子七成說。而於東坡山谷。亦多詆諆之詞。未可盡爲典要。然其學問深遠。才力宏富。古體時與魏晉。盛唐合轍。七律七絕。音調洪亮。詞旨沈著。可與遺山山谷分席。又其遭時多難。鸞音瘖口之作。往往與杜陵之野老吞聲。皋羽之西臺痛哭。同合於變雅離騷之旨。卽專論詩。亦明季一作家也。

擬古詩四首

臨歧送遠道。春草生道傍。春草生有時。遠行去無方。逝水無西歸。游子怨流光。高臺多夕風。平原足晨霜。去者日益永。留者情益警。玄雲迷四郊。方望不得騁。思君褰羅幃。滅燭無餘影。棄置良獨難。沒生誓幽秉。陽春二三月。綠草被修路。青林無鮮華。嘯鳩互晨暮。淒彼泉下人。不知春風度。馳驅無返轍。誰者爲新故。往古旣復然。非我獨憂懼。天物各推遷。胡爲滋驚怖。慮苦不得甘。蚤計良已誤。滅性以求真。浮光棲月露。鼎鼎百年中。含情抱貞素。

日落登崇岡。顧望青天高。四維何茫茫。浮雲但蕭騷。羣動旣已息。吾身若秋毫。自非精誠徹。蠕動徒已勞。精魄無固存。奄忽成焄蒿。及今百年內。何者終吾操。

古人不可期。今人當奈何。對酒乍相忘。援琴發清歌。適意方在茲。憂患徒相加。憤世而忘己。吾生亦有涯。商山採芝人。跡邇心自遐。

君子有所思行

天道不可見。往來孰令親。求仁信由己。循我得其真。宿糧陟穹谷。問彼度世人。浮屠東入漢。老聃西去秦。驚神離寶命。歛景蹇輕塵。屈理逐所歡。淫曼增迷淪。孟軻喪齊梁。辯言隱千春。堅壘拒輪攻。墨守固重關。傾筐貴所寘。室遠願不伸。夜聞曷旦急。秋驚絡緯新。時哉隨逝水。極渚暇逡巡。

擬阮步兵詠懷

涼風西南來。吹此浮雲興。連轡相異態。奄忽如有憑。日暮靈雨飛。消釋如春冰。步上西南山。揮手謝太清。肝膽一胡越。百年非我生。明滅隨須臾。吾心固不能。

雲山妙峯菴云是中秦芝鍊丹處

松陰合綠霧。木末飛空光。幽矚旣云密。遙情歛已長。首夏積翠鮮。亭午條風涼。煙容澄岳壑。水氣辨蒸湘。圓宇目所鏡。孤立心未央。寓形俄邂逅。仙遊昔回翔。惻彼鸞鶴情。引茲邱海望。羽蛻固有待。仁樂詎無方。懷炎登天庭。悲髮陟首陽。繕性良有藉。終焉胡弭忘。

瓜圃夕涼

微月流西岑。初螢明青囀。夕雨一以息。樾徑珠露泫。宵爾釋傾疴。冷然得靜善。吾生豈不夙。物役固未淺。往昔從棄捐。今懷何繾綣。精靈寓天宇。昭滌隨游衍。所思來者遙。孰俟心期展。脈脈霄漢間。悠悠寄孤撰。

廣哀詩有序

追平生交遊凋替之頻仍。老棲巖谷。惟病相耦而已。夫之自弱冠。幸不爲人厭捐。出入喪亂中。亦不知何以獨存。諸所哀者。或道在死。或理不宜死。及其時相輟會。以靖其心。以安其命。而不肖獨參差了然者。蔑論箴石。卽告語亦杜口矣。德業文章志行。自有等衰。非愚陋所敢定。抑此但述哀。

情不以隱顯爲先後。因長逝之歲月序之。杜陵八哀詩。竊嘗病其破蘇。李陶謝之體。今乃知悲吟不暇爲工有如此者。

管中翰嗣裘

字治仲。說李定國迎蹕拒孫可。不果。甲午遇害於永安州。

昂畢南北街。牛女東西涯。分合各有故。精靈終不欺。之子自跡弛。吾生本鈍遲。嶽陰義憤激。崧臺俯仰悲。雨雪封層巒。風潮盪縹緲。翦燈語自協。迷影聞者疑。駘宕吐丹虹。交映爲雌霓。臨歧一執手。畢命成參差。君速沉芷駕。白日照幽思。祕計誓齋粉。吾君在憂危。事左果致命。天傾難獨支。哀哉負密約。非但泣長離。欲傳幽靈心。未許流俗窺。魂爽儻夢遇。落日回坤維。

南嶽僧性翰

丙申沒

疇昔天狼驕。竄身潭龍吻。蟄龍不我攫。親舊但笑聽。飛雲護杖屨。匿影度崦嶮。側聞蓮花峯。去之雲中近。緇素不相疑。泥滓爲拭拭。羹芋或相貽。雪蕈偶同攜。不足恤死生。依之全曲謹。往來遂頻數。登眺獨疾忿。雜心非謝客。妙悟異龐蘊。爲有神駿賞。激揚忠憤隱。行歌方亢爽。社稷已齋粉。燒燈相嚮悲。坐待鐘聲殷。義旗同崎嶇。債敗無鬱窳。笑指樓閣燼。一如暮落槿。垂死猶致聲。心魂尙合脗。潭雲空淒迷。回望增悲愴。康州謠追哭督府義興相公。是去秋同鄒管二中舍會公地。

可憐康州城。瀧水從南來。龍旗翩翩去。何繇蒼梧迷。密雲不開。秋風起。秋葉飛。旗翩翩。去不歸。烏頭黑。雀

舌白城上飛聲啞啞。羽林軍神廐馬。昨日靈羊溪。今日康江下。楊花自飛鳥自栖。相公白旆清潯西。康州城下生蒺藜。

箏篴引

彈箏篴擊鼙鼓。留君君不住。素絲玉壺白水清。博山蘭膏飛煙輕。華月微風吹鳳笙。他人不語君含情。胡爲乎凌狂波而亂流。從君不果心繁憂。東海之魚不可得。西飛之鳥不可留。往者不諫。來者徒傷。寸心炯炯。明月光千里。萬里隨君傍。君凌濁水不見影。青天高懸獨傍徨。

不寐

夜火榜人驚。江沙依舸平。落花逢昨日。潮月應初生。芳草空凝望。綠雲詎有情。含悽愁夢杳。魚柝警嚴城。過李爲好山居信宿

紫雪桐花落。綠煙莎草凝。閑階斜日轉。薄篴緒風勝。消息中宵酒。過從太古僧。淹留春病減。君似一條冰。待于禮

望望還相待。悠悠問此心。禽歸孤樹夕。月上半峰陰。稻徑迷紆折。荷香送淺深。琅然琴韻在。莫止動游鱗。早春餘雪屬日偶成

溼雲飛不起。一半雪光欺。藥裹猶疇昔。鶯花笑幾時。烏藤苔露墜。白袷柳風吹。知否韶華借。閒心早自疑。

四月一日

莫更惜春光。遲遲愛景長。棟花三日雨。燕子一襟涼。魚影深搖綠。梅腮已上黃。韶華讀史過。天地儘清狂。
露坐和白沙

不辨香何際。回塘有芰荷。風來已良久。月上見微波。草氣從涼淨。星光在字多。韶英吾識汝。枯竹有鸞歌。
衡山曉發

擊汰遲楓浦。歸心就翠微。江空雙岸古。天小衆山圍。嶽氣雲侵縣。墟煙月掩扉。松杉回望裏。一谷曙光飛。
病

鑪火微紅壁影搖。窗明殘雪遠山椒。人間今夕寒宵永。故國殘山老病消。玉歷有年成朽蠹。青編無字紀漁樵。閒愁四海難棲泊。藥銚松聲滴暗潮。

江行

虔兵入衛氣驕橫。歸路廬陵屢夜驚。取次渚宮成賊壘。蕭條淮北盡空城。家山近望憐征雁。谿路含愁聽早鶯。還恐南枝棲不穩。曉來星影射長庚。

耒陽曹伯實翁丈招同陳耳臣廣文訪杜少陵故墓

孤城斜日射荒邱。華表蒼煙對荻洲。郢樹秦城悲弟妹。天清野曠弔孫劉。傷心素旆陳濤恨。回首寒砧白

帝秋莫向江湖怨飄泊。人間還有水西流。

讀指南集

揚州不死空坑死。出使皋亭事未央。鳴鳩春催三月雨。楓林秋忍一林霜。礪門鶴唳留朱序。文水魚書待武陽。滄海金椎終寂寞。汗青猶在淚衣裳。

秋雨同子直

秋陰何來飛雨淙。杜陵歎之後堯江。井桐已落不知數。水鳥無愁聊自雙。遊屐幾曾過柳岸。青尊只少對蘭缸。猶傳錦字開幽獨。溼月穿雲上小窗。

元日過子直奕

今日何年復歲朝。曉窗新夢試逍遙。韶光流轉誰消息。春賞殷勤久寂寥。竹徑雲深通綠靄。蘭芽雨沁透紅苗。高齋奕散前溪路。回望炊煙隔小橋。

長沙旅興

江上紅芽始試春。乳鶯調語正迎人。人間韶日還相識。花下暄風已試新。鶴杖恰逢苔逕輓。漁舟初繞碧波勻。乘乘生事餘年在。隨處桃花可問津。

遣懷

乾坤極目不消愁。生事崢嶸只敝裘。漁艇可容人釣雪。故鄉還似客登樓。探梅的礫丹砂蒂。問月殷勤白玉鈎。儘有風光相假借。無妨孤棹試中流。

春山漫興

餘春春閨太從容。卽次鶯花老漸慵。送夕柳邊斜照淺。留寒雨外溼雲重。烹龜自惜千年表。放鶴先栽九里松。人事天情宜痼疾。草堂曲曲暮煙封。

元夕

望月蟾蜍出淺霞。背人約莫數年華。垂楊向夕驚新綠。蠟炬停風結小花。寂歷影堂香篆靜。蕭清春逕蘚紋遮。南檐欲問平安竹。好護劉蠟處士家。

春興二首

嬉春遲暮老廉夫。長臥歸休舊酒徒。不分傳家三傳在。從來亡國一身孤。玉錢月影窺雙鬢。碧海雲波認五湖。一味龍鍾供世笑。蒼天還識老狂無。

樓空山遠溼雲蒸。返景長天暝色仍。千里湘泉歸雁雨。九江春水釣魚燈。馬殷家在生新草。陸遜營荒挂古藤。夢裏白蘋洲上月。遙遙北渚接黃陵。

五月前一夕唐心如以近詩見問病廢夜讀久矣卽夕口占寄意

榴花因雨不得紅。溪蓀浹露青煙叢。明朝誰續五絲縷。新月初彎一綫弓。楚國神絃惜往誓。山中桂樹思悲翁。紙窗晴日能相借。錦字憑開霧眼空。

病起

白髮重梳落萬莖。鏡花鏡影兩堪驚。水金丹訣聞方士。土木伎膏累友生。故國餘魂長縹緲。殘燈絕筆尚崢嶸。懸知藥力消冰雪。未擬垂楊聽早鶯。

昔夢

昔夢閒情一枕蠲。閒愁過眼萬心鑄。溼雲葉葉垂虹外。歸鳥泠泠晚照邊。礪草自分尋藥徑。湖天誰汎釣魚船。西清斜月能消得。片玉輕鬆半影懸。

雨餘小步

蓮花蓮葉柳塘西。疏雨疏風斜照低。竹籜冠輕容雪鬢。桃枝杖滑困春泥。垂虹疑飲雙溪水。砌草新添一寸萋。不擬孤山閒放鶴。鶉鳩恰恰向人啼。

宿別峯菴庶僊策杖來慰時方從哭送先兄歸壟

羃羃蒼煙護小橋。回峰斜引上方遙。歸禽邀日沈平楚。宿露冷風潤綠蕉。白髮共憐鐙影瘦。青山未遣淚痕銷。憑君昨日山陽笛。吹徹寒冰慰柳條。

別峯菴二如表長老類知予者對衆大言天下無和嶠之癖者唯船山一漢魏不克任而表師志趣於此徵矣就彼法中得坐脫其宜也詩以弔之

延陵未識披裘客。楊億還疑轉盼僧。銀地界中金屑眼。熱油鑪裏雪山冰。相逢歧路雙趺印。顧笑懸崖一杖登。今日重拈唯薦淚。秋山葉落冷枯藤。

絕句二首

名花珍重試芳叢。白酒朱旗醉曉風。近日園亭荒落盡。百錢買得一窠紅。
河滿子歌聲斷腸。人間難挽是斜陽。桃花零落留桃葉。簸蕩春風一倍狂。

樂府

西睺搖曳接龍游。生遣無愁果有愁。玉管金尊人盡哭。梧桐無葉不悲秋。
哭歐陽三弟叔敬沈湘

菖雨蘋風杜若香。懷沙千古弔瀟湘。遲回怕唱招魂曲。不信人間別已長。
南嶽摘茶詞

晴雲不采意如何。帶雨掠雲摘倍多。一色石薑葉笠子。不須綠箬襯青蓑。

陸世儀十六首

世儀字道威太倉州人諸生同治□年從祀孔廟有桴亭集

四庫總目世儀之學主於敦守禮法不虛談誠敬之旨施行實政不空爲心性之功於近代講學之家最爲篤實故其言曰天下無講學之人此世道之衰天下皆講學之人亦世道之衰嘉隆之間書院徧天下呼朋引類動輒千人附影逐聲廢時失事甚有借以行其私者此所謂處士橫議也又曰今所當學者正不止六藝如天文地理河渠兵法之類皆切於用世不可不講俗儒不知內聖外王之學徒高談性命無補於世所以來迂拙之謂也其言皆深切著明足砭虛僞之弊

鰲埼亭集桴亭先生之論白沙曰世多以白沙爲禪宗非也白沙曾點之流其意一主於灑脫曠閑以爲受用不屑苦思力索故其平日亦多賦詩寫字以自遣便與禪思相近或強問其心傳則答之曰有學無學有覺無覺言未嘗有得於禪也白沙本與敬齋俱學於吳氏皆以居敬爲主白沙和此日不再得詩曰吾道有宗主千秋朱紫陽說敬不離口示我入德方後來自成一家始以自然爲宗而敬齋則終身無所轉移是以有狂狷之分也論陽明曰陽明之學原自窮理讀書中來不然龍場一悟安得六經皆湊泊其言朱子格物之非謂嘗以庭前竹子試之七日而病是則禪家參竹篋之法元非朱子格物之說陽明自誤會耳陽明才氣過高遠爲致良知之說自樹一幟致良知固可入聖然打破敬字乃是壞良知也陽明之意主於簡易直捷以救支離之失故聰明者喜從之一切放下直下承當心粗膽大祇爲斷途一敬字陽明在聖門狂者之流也其論整菴曰陽明講學在正德甲戌乙亥之間整菴困知記一書作於嘉靖戊子己丑之際整菴自謂年垂四十始志學正陽明講學之時也其後致良知之說遍天下而整菴之書始出然則非陽明講學則整菴何以善人終其身而是書且不作朋友切磋之功其可少哉整菴四十志道年踰八十而卒四十餘年體認深切故其造詣精粹然其論理氣也不識理先於氣之旨而反以朱子爲猶隔一膜則是其未達也陽明工夫不及整菴十分之五整菴才氣不及陽明十分之五於整菴吾恨其聰明少於陽明吾恨其聰明多論白沙弟子曰門戶之盛始於甘泉書院生徒之盛游談奔走廢棄詩書遂開陽明一派東林繼統欲救其弊而終

不能不循書院生徒之習。以致買禍。此有明一代學術升降之闕也。論陽明弟子曰。姚江弟子。吾必以緒山爲巨擘。其序傳習錄曰。吾師以致知之旨。開示來學。學者躬修默悟。不敢以知解承。而惟以實體得。今師亡未及三紀。而格言微旨。日以淪晦。豈非吾黨身踐之不力。而多言有以病之耶。此蓋爲龍谿而發。而救正王學末流之功甚大。緒山雖以天泉之會。壓於龍谿。然不負陽明者。緒山也。終肯陽明之教者。龍谿也。凡先生思辨錄所述。上自周漢諸儒。以迄於今。仰而象緯律歷。下而禮樂政事。異同旁及異端。其所疏證。剖晰蓋數百萬言。無不粹且醇。其最足以分諸家紛爭之說。而百世俟之而不易者。在論明儒。予惟國初儒者。曰孫夏峯。曰黃梨洲。曰李二曲。最有名。而桴亭先生少知者。乃仿溫公所作文中子傳之例。采其粹言。爲傳一篇。以爲他日國史底本。

陳瑚確菴集。桴亭古風。取裁漢魏。近體得法李唐。不屑爲卑弱不振之調。

田按。桴亭古體。取達詞意。不專摹擬。五七律。格調軒爽。音節蒼涼。其講學立言。不與當世之分門戶。涉標榜者。角名爭勝。而沒後名。乃益彰。蓋能爲潛龍。乃能爲利見。不在一時。在千古矣。

哀黃雀

哀黃雀。黃雀飛且鳴。飛鳴一何急。苦饑不得食。荒田草離離。糝穀無糠粃。汝不聞東家之子。千金軀。朝來自分埋溝渠。那有餘穀活汝爲。

送閩中林衡者遊中原長歌

石齋先生天下師。君能弱冠長揖之。著書如風腕欲脫。吐論鑿鑿稱雄奇。石齋爲君亦拱手。略盡形骸呼小友。贈君藥言送君詩。直欲與君分半畝。石齋贈詩有應分半畝與君居之句天公天公何不仁。忠臣旣死英雄貧。嶺雲如

山戰骨白。至今閩海飛征塵。男兒致身苦不早。雙鬢蹉跎渾欲老。安能跼蹐下駒。鳳凰翱翔在蒼昊。東書蹠屨作壯游。志氣直欲凌九州。扁舟千里入吳會。上書論古驚同儔。腐儒如予那足道。感君意氣爲傾倒。揮毫贈我琅玕辭。愧乏瓊瑤無以報。君今策蹇問中原。山川漫漫道路昏。胡琴欲摔向何處。夜半起舞心煩冤。金陵城中王氣盡。蔣山斷樹生芝菌。日落江湖殘不波。維揚明月歌春蚓。君不見昔日江東祖士雅。擊楫中流淚盈把。又不見遼東白帽翁。語維經典甘孤窮。丈夫處世只兩途。吾子坎壈將安終。中原人才頗不惡。風塵往往傾然諾。昂然七尺未長貧。暗中定可相摸索。歸來過桴亭。西窗剪燭開短屏。交知四海見吾子。相對使人雙眼青。

乙酉元夕婁城盛張燈火有感而賦

塞北旌旗亂。江南采色多。敷天猶有淚。薄海但聞歌。遊女飛金爵。王孫曳玉珂。太平誠足樂。九世奈仇何。

張睢陽廟

捍禦功勳烈。江淮廟貌尊。一時羅鼠雀。千古祀鷄豚。天地心猶在。風塵氣更昏。英靈如可作。慷慨欲同論。

遙哭希聲錢公公。婁舊令也。申酉之難。開關嶺海。卒死王事。葬海中之瑯琪山。其二弟肇一兼三負。

遺書至婁因賦一律以誌思慕

營頭夜隕海濤奔。真宰茫茫未可論。絕島君臣留正朔。瘴天風雨葬忠魂。誰將心事傳龍比。賴有遺書屬

弟昆。千古崖山成恨事。臨風遙慟一傾尊。

次桓移居胥山之麓。自名胥江草堂。索贈。

越國春深構李城。胥山山下一江橫。南州高士新開徑。吳市英雄舊駐兵。帆影落窗晴欲暝。濤聲入簾夜還驚。浣溪莫漫誇名勝。此地滄桑眼倍明。

喜宋子猶從海上歸賦贈。

十年蹈海一身輕。故國重回代已更。夢裏鯨波如昨日。尊前鮭菜只平生。乾坤何處容孤往。邱壑吾儕且耦耕。遯世功夫正無限。可能相助一經營。

萬卷樓同扶九甫草夜飲。

萬卷樓開暮靄天。披襟此夕對高賢。一時人物雲中鶴。千里交情雪後船。震澤長風吹劍氣。包山秋色在詩篇。卻憐寂寞江亭下。剩有畸人獨草玄。

清明

二月輕寒又禁煙。郊原祭掃正紛然。桃花欲放鶯初語。楊柳新垂燕可憐。杜老春衣頻自典。漢宮蠟燭有誰傳。十年樵牧冬青老。寥落東風怨紙錢。

同葛瑞五遊吾谷

湖山久絕剡溪舟。忽漫相過續舊遊。樹裏波光高出屋。松間日色冷於秋。軟輿素舸芳時樂。石馬穹碑故國愁。惟有丹楓如血淚。年年和雨滴荒邱。

次韻挽瞿稼軒歸葬

稼軒爲桂林留守死難贈臨桂伯其孫扶柩歸葬

砥柱乾坤賴老謀。那堪宰相盡風流。橫江已斷千尋鎖。籌國誰開萬里樓。南粵兵戈行殿恨。東皋花木故園愁。稼軒思故鄉于桂林作別墅名小東皋。渡河只有宗留守。慟哭相從地下遊。

重陽後一日含綠堂雅集

茱萸插罷酒還沽。餘興龍山尙未孤。萬古乾坤皆草莽。一時人物在菰蘆。月泉開社天星聚。鐵匣緘詩井水枯。宇內誰成三不朽。壯心空老北山愚。

辟彊園畫社卽席分韻

舉目青山是處愁。桃源漁父路悠悠。峨眉風雪林巒迴。海國雲霞島嶼浮。欲共向平棲五岳。誰從陶峴借三舟。不如坦腹長松下。欹枕看圖作臥遊。

出鄱陽泛大江作

一葉橫過彭蠡秋。大江東下接滄洲。半天劃界開長壑。萬里奔山送急流。南國君臣常恃險。北來車馬每生愁。靖康渡後虛名失。不用投鞭穩放舟。

偶念熊芝岡有作

履霜自爾至堅冰。今日何須重歎驚。二十年前檀道濟。中原已自壞長城。

過寶帶橋

澹臺湖水綠如油。寶帶橋平足練浮。好種碧桃三萬樹。年年花裏作春遊。

陳瑚九首

瑚字言夏。太倉州人。崇禎壬午舉人。有確菴集。

錢謙益有學集。嘉隆之間。吳中文章家以聲華浮豔爲能事。岷山歸熙甫守其樸學。言稱古昔。與其章布弟子。端拜循誦。倡道於荒江寂寞之濱。於是吳中有歸氏之學。逮及百年。而確菴陳子挺生於百里之內。磨礪名行。鐵礪經術。學者確然奉爲大師。人皆曰。確菴子今之歸熙甫也。

王流壑舟園叢。先生十五。與同志陸桴亭世儀。盛寒溪敬。江藥園士韶。結文會。年二十五。始與三人約爲聖賢之學。壬午。舉鄉薦。遇黃陶菴。曰。試若不售。受國恩淺。猶是草野一介耳。則竄伏於荒江寂寞之濱。著書傳道。以畢餘生。亦中道也。陶菴捷。先生下第歸。聞京師陷。痛哭焚衣冠。願治丙戌。遷居蔚村。陳頑潭。有田數畝。躬自荷鋤。與諸子講學。做呂氏鄉約。朱子白鹿洞規。溫公真率會遺意。青蓮社約法。教以人倫。相戒以不妄言。不計私。不謀利。不作無益。又爲講規。以孝弟。力田。行善爲蔚村三約。州守白公以先生名應徵。峻拒之。曰。執事若不撤回成命。卽當削髮入山。況所欲有甚於生。萬一急不擇音。得母爲仁政累乎。州守乃寢。年六三卒。門人私諡安道先生。

婁東詩派。桴亭詩以渾灑勝。確菴詩以沈雄勝。工力悉敵。

過吳門有感

不泊吳關下。星霜又幾回。
轆車新使舫。煙草舊歌臺。
易入王維恨。能令庾信哀。
桃花緣底事。還傍戰場開。

宿顧雅儔草堂

幽人住何處。墨莊東復東。
卷簾看曉日。散帙坐晴風。
客話烹蠶豈。僧過翦鹿葱。
一時偕隱樂。可得似梁鴻。

邨居

蘆白楓丹照綠蘋。粘天波浪自鄰鄰。
愁知日月摧雙鬢。貧覺妻孥絆一身。
詩卷行吟書甲子。熏爐匡坐守庚申。
南山當戶明如髻。相對年年似故人。

春日

春上清溪冰復開。山村煙景若爲催。
枝頭有鳥窺虛牖。門外無人墜落梅。
餉米一蓑衝雲去。市魚孤棹帶花回。
久知學道能忘世。只恐猶添萬恨來。

次韻劉文成夏日雜興

綠波渺渺暗荒郊。日與忘情草木交。
蘆葉一灣圍鷺宅。蓮花千歲老龜巢。
移床就樹雲爲幄。倚竹懷人月滿梢。
不用勞勞叩詹尹。十年前已決誅茆。

鹽鐵塘別石隱寒溪桴亭默菴

回首愁雲思惘然。舟分南北淚如泉。十年兄弟空雙鬢。四海功名剩一氈。看世有心留白眼。埋憂無地問青天。何時合買深山住。欲借襄陽百萬錢。

映碧先生見遺地圖

圖畫山川感慨多。邊陲風景近如何。入關無復蕭丞相。聚米空思馬伏波。兩戒一江橫似線。九州五嶽小如螺。錯疑留守魂歸夜。風雨聲聲喚渡河。

簡黃攝六

鬢絲初白佛燈紅。回首當年事事空。花落花開三月裏。人歌人哭十年中。宅邊綠柳思陶令。洞裏丹砂問葛翁。又見榆煙近寒食。健兒驅馬鬪春風。

所見

萬戶千門一炬焦。燕棲林木雨瀟瀟。藏春草暗先生塢。丁卯煙寒刺史橋。古寺號烏新鬼哭。空城走馬健兒驕。舞雞擊楫都成夢。搔首江頭看落潮。

送王石谷

臺城秋草暮雲殘。六代興亡雁影寒。無限傷心金粉地。憑君畫出與人看。

